

四庫全書

子部

欽定四庫全書

子部

物理小識卷八

詳校官庶吉士臣汪彥博

員外郎臣牛稔文覆勘

覆校官編修臣汪鏞

校對官中書臣金光悌

謄錄監生臣黃廷瑩

欽定四庫全書

物理小識卷八

明方以智撰

器用類

箋紙 永樂于江西造連七紙奏本出鈐山榜紙出浙之常山廬之英山宣德五年造素馨紙印有洒金箋五色金粉磁青蠟箋此外薛濤箋則卷潢雲母粉者鏡面高麗則繭紙也後唐澄心堂紙絕少松江潭箋或倣宋藏經箋清荆川連茆梢蠟研者也宣德陳清欸白楮皮

厚可揭三四張聲和而有穰其桑皮者牙色暮光者可書今則綿推興國涇縣敝邑桐城浮山左亦抄楮皮結香紙邵建則竹紙順昌紙東紙則廣信為佳即奏本也

續錄曰北紙橫
簾南紙豎簾

抄紙法 治楮者漚之投黃葵之根則釋而為淖糜酌諸槽抄之以簾其薄者一再抄厚至五六抄覆諸夾牆煖乾而揭之或以石灰水浸楮後滌其灰偽者加竹料草料以粉取白則沁不耐書矣竹取筍初成竹斷之去

青謂之竹絲浸而舂之江西抄者粗其抄草紙按尺者
煮當子藤葉抄而累之則番張不黏或用榆皮閩中抄
竹紙簡紙取榔樹合圍者鋸片舂碎煮水抄簾乃可竿
之而番張烤燂也或用大圓黃香樹皮廣信用羊桃藤
水皆取其滑

作故色紙 樺皮燒烟熏紙作故色如泥凡紙沁者熏

之不沁

續錄曰紙自然故者其表故色其裏必新

潢槌法 潢百幅白礬倍黃明膠滾化而稀水收之槌

紙以一濕一乾合百為垛用大石壓一伏時乃槌三百下以互間勻疊為度米元章硯越竹如金版入茆番覆輟耕錄亦載藏經紙法茆合石硯為光

筆法 兔穎鼠狼雞雉胎髮皆可為之銳齊圓健其四德也唐有筆匠鐵頭宣州諸葛高常州許穎李端叔稱歷陽柳材黃山谷言郎奇棗心散卓今巨細純羊毫近之以宛轉滿志也妙手近推湖州府李家渡業遍天下大率毫少倍狸獮耳鼠毫者竹鼯尾毫也兔毫惟前肩

者尖健壺中贅錄曰養筆以硫黃酒舒其毫取冬水筆亦防蠹也東坡書杜君懿藏諸葛筆每百枝用汞粉沸湯研墨膠筆不蠹不燥又曰生毫筆成飯甑蒸出懸水甕數月乃可用山谷用椒檠煎湯磨松煤染筆乾後收貯或以靛染之馮應京曰洗筆宜熱水

辨硯 硯譜青州紅絲第一柳公權用之其實端第一次歛次臨洮駝磯廬山常山不及也熟鐵硯重倭漆查硯輕澄泥如銅雀瓦類後倣而瘞泥生潤耳端州今肇

慶宋欽宗改名釜柯山即鷹羊峽有小湘後歷石砬砬
水巖西下巖大小秋風桃花其名也宋宗室希鵬續錄
曰下巖惟漆黑青花二種扣之無聲磨墨亦無聲卵石
去臆有花點吳淑硯賦所謂點滴青花久在水底難得
矣今分將軍梅花老坑水坑以蕉葉白火納文辨水巖
亦因病而識之張世南謂之火黯外石號屏風背多紫
白綠鵲眼條絲有黃綠硃青數十重明潤者朱子暇
治憫
守端曰嫩鋒橫斷發墨最神似端者九谿漆石沅州黑石

也洮有猿頭斑瓜皮黃蚤紋

陸子淵得洮石

龍尾為李後主開

羊關嶺有棗心諸坑刷絲內裏叢絲馬尾獨吐諸名正

視如洒墨側視刷絲燦然

中德曰洗硯宜蓮蓬穰半夏切平不可紙拭中通曰滾水

洗易乾然泉浸所以養石若墨膠久滑當以麤炭略磨

假鵠眼

取龜尿和色先炙石而塗之直穿石底

郭林曰鱗

龜以火煇之又乍冷之以聲驚之彼即溺出中通按李士材云以猪鬃鼻內截之即出

做宋硯

磚磨後置沙中敲之則缺痕古上墨塗之浸

水半日洗去乾復塗墨久即上銹加礬易上然不如空

墨水之有光王肯堂曰研瓦始唐人邵伯溫曰研中隆起如瓦以不畱墨為貴百年後方可就平今窪中示古何為乎

墨法 石腦油烟作墨堅重以松烟者疏而碧今不必也李廷珪上矣近代程君房方于魯祝彥輔羅小華丁南羽邵青邱吳去塵吳百昌象玄潘方凱方回嘉客環山方伯闇數遠不惜萬金故得合諸家秘法君房于魯以神宗見取名彰耳法以蘇木煮草去草性燃烟所製

金紫照人漆烟作墨其色反白獨用豬脂作墨不成君
房以脂入頂烟六分之一其墨細潤書畫尚焉其入金
泥硃砂冰麝者貴之也水用甕山易泉膠用鹿膠阿膠
次廣膠天雨錐之不動市上牛皮膠合者要矣膽用熊
膽次青魚膽吳去塵獨用豬膽為其易也取其動而化
膠黑能增色也然豬膽久之適如其質而已不能增也
古藏墨以豹囊然至燕地往往化粉惟君房伯闇兩家
墨入燕堅倍於南昔君房伯闇互相問而不言各悟而

後知若合符節良以北方風高法以百日耐釀斤用三
銖故不碎也製以秋和之日無風重房萬杵乃成所忌
者天陰陰則墨餲矣試法頂烟墨口可以截紙投清水
盪中一晝夜如故熊膽力也君房玄元靈氣于魯青鱗
髓潘方凱石蓮秘寶方回宜宜堂嘉客客道人吳百昌
紫雪程孟陽松圓閣方伯閣寫經墨澤遠一笏金數遠
碧水神珠廣居神髓皆累試累驗之其他亦不勝記矣
驗墨之成色與白金等潘嘉客試墨帖言之甚詳其磨

各墨而浸觀其黑者一端也其以新而冒舊者竄之石
灰中一晝夜而出者也儲泳祛疑曰墨在製膠煎膠練
杵鐵石臼中而已區區秦皮紫草適足為累

中通曰墨
用膠輕故

須萬杵
乃勻

冬硯 冬以楊花鋪硯槽則不冰曰春風膏或鹽磨墨
或火酒

劣墨發光法 蠟梅皮浸水磨墨有光用白糖則膠矣

兆竟曰冬用
米醋磨墨

帖搨類 舊搨紙薄久則磨光而紙面無氣味即謂之
墨香可也淳化閣帖棗木刻用匱紙或用烏金搨或蟬
翼搨有銀鈿痕大觀刻于太清樓潘師旦刻為絳帖
希白潭州帖劉次莊戲魚堂此外武岡彭州泉州諸本
不一若寶賢堂東書堂則周藩晉藩搨也陶九成言蘭
亭百十七刻定武褚臨皆宋人臨者多矣金石集于歐
陽公趙德甫鐘鼎篆韻合於薛用敏徽欽時上好下趣
容可盡信耶漢魏一字三字石經少矣陝碑為唐鄭覃

書又有孟蜀石經南宋石經詳見通雅

余全人曰淳化閣帖宋季南符

遺于泉州已湮池中時出光怪發之即是馬蹄真跡謂銀錠據痕也中通曰搨先煮墨絹包試而搨之為蟬翼須蠟一磨北方用駱駝油市上用雞子青中履曰或以燭油入墨礬兆克曰墨亦礬調待紙將乾則勻而不枯不滲也刷雞卵青者天陰轉潮須洗發團之微用白蠟磨搨帖面永遠發光又可常用

書畫類

書貴鍾王而虞取其健秀褚取其緊俊歐顏

取其矩法後則分體擅長黃山谷謂樂毅論為王著書小僧縛律楊凝式為散僧入勝獨服東坡之沈著張旭書智永壁楷法妙絕而草書顛逸字字皆在法度中此

善評也畫以小李思訓李成郭熙為北宋王維以至董
巨倪黃為南宗究不相掩各臻其致大約紙絹無過千
年者自黃長睿董彥遠米襄陽諸公所謂宋時已無晉
物今有宋元人摹倣筆即是神品唐絹粗扁宋絹極細
新絲燒之則楚然而就焦焦作絲臭年久者否藏此者
貴舒卷即免濕蠹然火燭風日不洗手屢忌觀玩河東
張愛賓論鑒識收藏精矣

中德曰松江畫絹三錢餘一
方方闊三尺可以比宋宣德

雲鶴裱綾亦有織者
南京則粗絺不精也

裝潢法 表褙作池故曰潢也大約黏宜省漿表宜綿
紙多刷自沁故縣壁不瓦壤攢必俟天潤上壁貴其滋
調下壁則宜燥矣表冊挖紙不在綾絹續用笈背縫忌
當畫心卷舒久之必然有損吳中湯強為精強氏常住
王弇州園今顧元方稱莊希叔頤頤湯強周江左嘗記
之其時貴秋冬春中夏下忌暑溽也春以皂角一挺滑
石白礬川椒黃蠟油各一兩夏用蠟礬艾各一兩金精
石木鼈子秦朮白芨芫花各半兩烏頭信巴豆少許皂

角一挺秋加石燕少許冬用黃蠟一兩白礬五錢礮砂
二錢茯苓三兩鹽三錢麴一斤其研子者用白芨錫并
熬以肥皂搓水一升聽後用蠟一處同煎

蘇用撞袿挖
散即無接縫

高
低

黏法 花椒湯去椒以盆冷之旋糝白麴令其慢沉不
可攪動明早攪勻或浸數日每日一攪淋去原浸之湯
却入白礬末乳香少許新水調和冷鍋旋搗不令結塊
方以慢熟之切作塊以原湯浸椒湯煮之攪勻再煮候

熟取置盆內用冷水浸其面常換水可留數月用之碑
帖外殼宜以芡礬蠟椒乳香三伏厚黏曝而壓之成器
後須近人氣如牀榻上待一年後藥性已定其堅如石
永不蒸蛀矣李如一曰加楮汁更牢或麪和芡末入水
不可將水入麪也中通曰麪作塊入礬白蠟末用水
煮之俟麪浮起為度後入清水浸之
至省漿白泛即易水待其泛盡取出待乾配入白芨汁
作糊永遠不受微濕欲以蒟蘆絹紙則用抄紙之漿澀
之

畫色 靛花藤黃作綠研楮合膠朱用砂乳謂之綽絳

其研飛大青石綠者後必托粉花蔥用胭脂碧蟬秦皮

配色更鮮水墨加色浸泌顯青紙可也

先泌黃水宿夜泌之乃藍生

紙細染界處以礬筆襯之磨墨待澄用其浮者遠山飽

水筆尖蘸淡墨抹之噴濕烘染深淺不沁

中通曰硃砂不變色銀硃

紅花久在風日則變畫家乳硃砂漂之去浮用中者乳而用之標作丹赭用印色用標取其細也石青難研以

耳塞粟許彈入便成粉

異色 雜俎言畫鬼神目隨人轉以曾青和壁魚也盛

伯舍為錢仲馭取螢畫漁火愚笑之蓋禁方用梟睛螢

尾乳金則夜有光想合方別有法耳宗高文虎蓼花洲
錄云徐諤得畫牛晝在欄外夜歸欄中李煜獻太宗徧
問不知惟僧贊寧曰南倭海中方諸蚌淚得之和色則
晝隱而夜見沃焦風燒嵐石落得之磨色則晝見而夜
晦見張騫海外經後杜鎬簡三館果見之物理久而愈
出信然

寫影法 首腰足三停立則為首者七坐則為首者五
自頂顙至下頷以眼為中自眼至頷以鼻頭為中其面

或長或短或仰鼻或大口眼更多變耳視何等老少在
皴皴顏見勢此其槩也畫家皆以紙版對臨以草灰紙
隔而研其紋乃以筆分之愚見魏子一於扇上水墨為
人寫真一一逼肖故是神穎

通曰眼用墨圈藤黃而細破之有玻鏡攝摹法暄曰

畫色用膠蓋之永不為塵侵

刻碑法 雙鉤過硃難得入神米元章謂顏魯公筆迹
家僅修改波磔失真惟廬山吉州題名為不失也神隱
曰樂毅論是就石書丹張大復曰章簡甫搬涉其韻愈

勝而章林石田曰但守鋒穎不差毫髮底幾可嗣先民
摹帖紙 嚮搗槌蠟明如鮎角次捶油紙若熟桐油重
塗綿紙久則茶洗可用數年

礬書白字 皂礬水寫字入五倍子水中鹽漬寫紙烘
以火革麻子油寫撒紙灰或杏仁灰俱可見又曰白茛
研汁入礬灰蘸礬灰書黃竹紙俱如丹

寫不上者有法 薑汁研墨書布絹不湮石工以大蒜
粘石市錫者以蘿蔔書錫肥皂水磨墨書油紙畫燭

字浮水上法 黃檗白礬就紙書字乘濕入水沉之去
紙則字畫脫浮於水面或磨黃芩

洗畫上黑法 畫上粉被黑或硫烟熏以石灰湯蘸洗

二三次則色復舊

中通曰周江左言用枇杷拭洗畫上
微鏹浸滾水冷定洗之則微氣垢污

畫去亦可皂角又須急以清
水淋去枇杷拭皂角之餘氣

洗誤字法 宋久夫云蔓荊子二錢龍骨一錢柏子五

分白丁香十條定粉少許俱為細末點水於字上取藥
摻之少頃拂去一方廐糞白馬珂螺粉洒之數洗即去

中通曰濕之覆以紙取瑪瑙研之則墨自去
防奸者寫成後以桐油沁之則必不可洗補

頃刻碑法 以鐵浸水加礬以白筆書之拖墨硯上則
礬不受墨成白字又以此書紙上不見字浮水即見舊
傳烏鰂腹水立券久則不見今試之先書時不似墨但

變色耳

中履曰以裨汁磨
墨拖礬書之紙

藏書辟蠹 芸香即七里香山谷謂之山礬非楓膠香
也鄱縣石魚商山必栗香作書軸白魚不犯葢沉檀降
香作軸皆不蠹也尋常宜用桐杉膠則易蒸糊則生蛀

以苦楝子末生麪粘之屏玉雖貴紙何以能勝耶春宮
圖謂之籠底書以此辟蠹乃厭之也莽草蒿苴熏之即
去愚者曰竹紙有漿粉故易生蠹真綿紙書不生蠹古

用黃卷以漬檠殺蟲也

中履曰書厨可置樟
腦雄黃以茱表之

揭濕黏法 書浥水不開者火酒燒過含其剩水噴之
即開黏而欲其易開者豆粉黏也

芝泥法 茶油四兩皂角九錢白芨去皮毛五錢金狗
毛取毛一錢老生薑去皮五錢以武火熬文火漫收之

滴珠為候絹濾去滓再煎數沸艾絨四錢銀硃四錢油調之再蒸再晒聽用朱太環曰入乾薑熬油者等其重去其薑而陽光所漉濁者下矣以之印紙易乾冬用之不凍與艾絨和而不臄松雪並用麻油一兩入七草麻肉熬令色改即漉去投荻椒礬牙皂文武三沸又濾去俟油成珠投黃蠟少許濾去其滓貯瓷瓶瘞地月餘用水花銀硃研淘加油染煮帛熟艾鵝毛吐絲之類以絹囊縫固內於印池硃六錢加辰砂四錢為優吳寧堊紀

用穿山甲油取其不滲程穆倩加大青取其發紫艷也

盛白含得錢仲馭法以燈心調粉日之碾則易碎再以

水澄其粉在下以之受油妙於艾絨

中德曰埋革麻油三年取出色白如

水復晒之熟每斤入黃蠟一錢白礬一錢茱萸二錢時之研硃砂水飛去黃礬與砂脚用中間細者入盥加燒酒微火煮一炷香取乾又研乃拌艾絨艾絨以屢煮屢磨乃熟如綿中通曰油於印外者加白薇中履曰蘇合最飲入附子則金扇面立乾或入陀僧謝在杭曰蚌油合硃砂印色隱起

香類

沉香出海南諸國木類椿櫟凌冬不凋橘葉麝

花實如櫛枕自腐結香曰熟結上也斫鑿而結曰生結

水朽曰脫落因蠹隙結曰蟲漏各有沉棧

一作菱即速也

黃熟

其剔取也雞骨等名其狀也

角革黃烏水盃青桂蠟璽茵芝金絡竹簾機梭馬蹄

牛頭燕口蜎刺龍鱗烏刺虎脰鵬斑仙杖及杵臼肘拳鳳雀龜蛇等

萬安黎母山東峒冠

絕警者雜黎中秋月夜探之香透林起以朝陽幽醞也

奇南同類自分陰陽盧頤曰沉牝也味苦性利其香含

藏燒更芳烈陰體陽用也奇南牡也味辣沾舌麻木其

香忽發而性能閉二便陽體陰用也

奇南有綠結油糖蜜結金絲虎斑等

鋸之其屑成團舶來者佳沉則瓊甜

金樓子俞益期一木四香說也

栴檀是檀

香雖舌是母丁香薰陸滴垂是乳香出波斯類陳懋仁
松藿香是草何乃以一木耶槩言皆木出耳

曰千年榕生伽南劉薦叔曰有力之木皆降皆結其枝
皆青托香其屑皆黃屑也安息金顏篤耨亞濕唵叭皆
木脂煉收者龍腦出婆律抹羅短叱諸國南海深山亦
有之因名波律其木類杉葉圓皮散仁粒如縮砂蜜者
肥而流膏其無花實者瘦有時噴香人以帛敷地驚墮
如蝶頃刻吸香入木不易得也斷之待乾析理溢片或
鋸板劈取有梅花腦速腦米腦赤者曰父婆律

中通曰
吸烟瑣

喉者真世多升
柿腦作冰片

蘇合油能歛香迷迭草燒之去鬼龍涎
則取諸海木上者焚真龍涎翠烟結空坐可剪分香縷
外紀曰龍涎是土中產初流出如脂至海凝塊有千斤
者又云有獸吐涎曰龍涎香惟黑人國與伯西兒海最
多泉州市舶稅課云占城賓達儂香多三佛齊多黃檀
藥沉占城出麝香木暹羅出羅斛香梨香降真香渤泥
有金脚腦水札腦登流眉有薔薇木

奇制法 有曰金龜吐艷者以柳灰丹粉芟為之而腹

含衆香也欲其樓臺則加乾荷葉午日陰乾欲見人物

則用男胎髮剪勻入內欲見仙鶴則加水秀才

中通曰水面長

足虫午日收五十枚入之欲見香毬則加寄生草欲見白

雲鋪地則加鉛粉其總藥則甘松白芷零陵橐本霍香

大黃玄參香附沉檀降乳各五錢末而蜜之甲子曰攢

丙子碾戊子和庚子丸壬子盛再甲子焚之

不作金龜
則為小餅

夷門廣牘曰瓊內荷葉五月時以蜜塗之自有小蟲食

其青翠惟存本葉紗粘摘去其柄暴乾為末合香入少

許則烟盤於上用筋分劃為雲篆字皆可是亦聲軒之

幻也聚香以艾納酸棗仁甲煎

甲螺掩也取如龍耳者
灰汁酒澆再以旨酒入

蜜炒之
如金

選香薰香 東莞斫白木椿歲淖堆之隔年鑿取一層

久則愈妙今名牙香亦名黃熟其生香發青點者曰選

香

白香四分一斤
選香斤且二兩

彫去白木但存油結坐書帷中隔蒸

其魂此非淺躁人所領矣熏香者三伏包花同暴也或

以芳花同炭紙封曝之需簡曰南方秉火英華發外草

木多香

合香易簡法 合香不厭多麝得蛇蛻片腦得相思子

香益甚其入沉麝蘇合者瓷盒蠟封瘞地月餘為妙合

香除煉蜜則取圓樹汁

似桂

或以榆皮或黃香皮嶺南北

有青香樹

冬不凋者

范石湖取橄欖脂香泡花

柚花

蒸香其窮

六和者荔枝殼甘蔗滓乾柏葉黃棟頭梨棗核任加松

楓毬

江東因呼黃棟頭楓脂為欖香

稻稈燒甘蔗米泔浸大黃再宿燒

之皆妙

焚香法 煤餅之上香錢隔火或玉片或雲母或銀或砂屠赤水言剪火浣布銀鑲為最低几焚香則烟穗變化綿紙裱室以收香也楊廷秀云琢瓷作鼎碧于水削銀為葉輕于紙不文不武火力均閉閣垂簾風不起必山愚者曰內經載香氣湊脾首楞言水沉無令見火此焚香埋火之昉也麝檀夷香最熱惟東莞選香養人倉卒難致惟窮六和耳浮山句曰窮六和香宜土屋瓦爐茶餅晝夜足木根野火爆三伏山人不羨龍涎福復銘

之曰香舍其身用其餘魂燒不見火密室知恩

熏衣法 沸湯置熏籠下衣覆取潤乃以香熏則入

藏奇南香 錫匣下貯蜜蘇合鑿竅為隔則潤若枯者
用白蓼葉置之瘞土數月即復日中少曝尤香

發舊香 清波志曰佩香用久不香以虎子盥一夕則
香

琴法 自臨岳及龍齧分周天度四分用三自一徽至
四徽猶九徽至十三也七為中

詳見
時論

凡聲從中起而上

下應之細分二十四徽木用泡桐宋久夫謂梧桐作琴
貞白謂剛桐作琴皆非也漆灰久則紋斷有蛇腹牛毛
梅花數種其偽者一火一煉之者也細無痕者佳神隱
取劍鋒斷束坡云琴絃舊則聲闇桑葉揩之新無如其
青何愚者曰生天門冬煮琴絃如玉坡又云木本實而
末虛惟桐小枝實而本皆中虛故世貴孫枝也實故絲
中有木聲愚者曰高興語耳琴取泡桐虛木有聲又削
之而不毛陽材琴暮清雨清陰材琴旦清晴清易時則

濁造琴家古稱雷文張越

池口有
啓收聲

成化有豐城萬隆弘

治有杭州惠祥高騰祝海鶴崇禎時大內造琴五百張

具各種式不過金玉寶石裝之耳其大腹者音洪揚大

經云

神隱曰范連州百納非法也
為漆礮矣桐木不宜太鬆

宮扇類 摺疊扇貢于東夷永樂間盛行陸文裕得楊

妹孖寫扇摺痕尚存東坡言高麗白松扇是也智按孫

恂韻注搗扇則唐人已有了矣取宮扇川扇者以其輕而

易收漆骨不汗綿漆不畏風日也蜀府用丹稜綿紙有

藤骨者徽杭加金加彩金銀鉸皆以蜀府棹色為地故
槩名之曰蜀府又有折團扇折掌扇凡辨舊川扇以欸
以紙嘗嗅而知之無紙漆氣然偽者以紙封而烟熏之

書畫以蘇白地毛金為貴偽者銅錫箔熏或以洒陽沙

蟲矢熏

竹骨出江閩而吳中水磨紫檀棕竹桃榔相思
湘斑皆可為邊有雕者莆田漆骨有黑紫紅今

南京以油假矢扇而
膠氣須鹿血絹拭之

陽燧倒影 存中曰陽燧照物皆倒算家謂之格術如
人搖觴梟為之礙故也鳶飛空中影隨鳶移或中間為

牕隙所束則影與鳶遂相違鳶東則影西鳶西則影東
又如牕隙中樓臺之影中間為牕所束亦皆倒垂與陽
燧一也陽燧面窪以一指迫而照之則正漸遠則無所
見過此遂倒則無所見處正如牕隙觴泉腰鼓礙之本
末相格遂成搖盪之勢故舉手則影愈下下手則影愈
上此可見陽燧面窪向日照之光皆聚向內離鏡一二
寸光聚為一點大如麻菽著物則火發此腰鼓最細處
也段成式謂海翻則招影倒謬也陸放翁見福州萬壽

塔成都正法塔影倒而未言其理智見牛首塔影寓白
門塔影樓而悟人自不察耳凡寶石面凸則光成一條
有數稜則必有一面五色如蛾眉放光石六面也水晶
壓紙三面也燒料三面水晶亦五色峽日射飛泉成五
色人於回牆間向日噴水亦成五色故知虹蜺之彩星
月之暈五色之雲皆同此理

中通曰水能攝物入其中
物近水影在水面物遠水

影在水底故池中樹木人物悉皆倒影空氣按地者屬
水故能攝物其影亦倒地上有一物空中有一影空中
皆氣故也暗室向明鑿小圓孔垣外之物皆能攝入壁
上皆倒影乃攝入虛空氣中之倒影也光大則奪目晃

洋相掩故頗小光影始可見物在東影在西物在西影在東者非特影也人目亦然左視則物在右右視則物在左至交處則左右視俱在一所過交則右視在右左視在左物豈有左右哉目藏血水其攝光如是耳暄曰視差法亦以人之東西視有左右而知交處之物離地遠近

鏡光 縣軒轅鏡硃砂塗系圍四鏡相照能辟邪智謂
楞嚴壇十六鏡上下攝照即此意也方書言置鏡牀上
下令小兒安光射氣通互照攝膽異聞記隋王度鏡照
人免疫江錄言漢宣帝照妖鏡如錢椎牧閒話言孟昶
時張敞鏡雜俎言無勞縣耕得照骨鏡宋史奉寧縣田

父得鏡病熱者照之骨寒此其質鑄固異要以光攝生

寒耳

中通曰鹿角燒灰白礬銀母砂等分為末磨鏡永遠不暗

鑄法 錫銅相和得水澆之極堅世言秦鏡白銅古詩
有青銅鏡中亦有錫錫和水銀急不相脫以入銅則尤
明考工所云鑑錐之齊令升所記是矣今磨鏡之藥乃
錫汞也足徵錫汞煉銅之光

鏡背紋 世有日中見鏡背盤龍入室則隱者有鏡背
久久青斑似花者人不解其故以為異寶此假作者先

以精銅少劑鑄鏡鑿龍或花其背復鎔倍錫之銅劑填之磨使平又以鉛蓋其面日中照之則龍文盡出博物如沈存中猶訝透光之奇吾衍始明之智因推自生若花者銅劑多久則綠更久則翠因汞氣乃生硃砂水銀其錫劑多者久則黯綠更久則黑或如漆今漸生者遇地氣或鹽醋氣銅地日變生色與錫地所變之色異也

呵鏡法

以津唾畫鏡令乾呵鏡自見

指南說

磁針指南何也鏡源曰磁陽故指南愚者曰

蒂極臍極定軸子午不動而卯酉旋轉故縣絲以蠟綴針亦指南存中云此處指南必偏丙位舶商言大秦西海偏丁位則中土在崑崙東彼海在崑崙西其氣隨地

勢而少變者乎

滕揖曰鐵條長而均者縣之亦指南不獨此也五金皆指南金重故也沉於水

亦必指南惟水淺不及旋定則有亂向若深水則任其本勢矣歐宗衡曰興國縣北鄉一石若龜首北向移之次早如故暄曰物皆向南也凡竹木金石條而長者縣空浮水能自轉移者皆向南向東西動而南北靜也針淬而指南應南極垂而北極高也石首向北尾則向南重故也鱈首仰則南北首舉而尾垂也旱碓臨南臨西則轉臨東北則不轉東來氣北上仰也赤道以南則反是或疑石之能移曰氣能飛山移石竹木鐵石恒轉移

于空中水中即能轉移于氣中也石不必皆移而此石
精瑩其與此地之氣相吸耳中通曰東西轉者地上氣
也物圓而長雖重亦隨氣轉故不指東西而指南北也
針若扁或方輪者則亂指南之極北之極日月腰輪之
國針即不
指南矣

漆器法

陶九成曰胎骨曰捲素膠嵌曰稍當

去聲

三灰

而糙漆久而磨之始用黑光其漆加雞子清日晒試緊
慢多入觸藥乃成黑光既乾乃以雞肝石揩去漆額所
謂觸藥以醋合鐵漿沫也鰻水煎桐油入丹粉無名異
也西皮作犀毘漆五色相疊如雲者也宋有鑽西以鑽

戲金成花其空處曰鑽西也元有張成松楊茂剔紅即
雕漆也宋有細螺即螺鈿也永樂果園廠製最精有剔
紅填漆戲金倭漆螺鈿諸種宋多金銀為素今以錫木
為胎舊稱蔣制倭漆與潘鑄倭銅正統楊埧描漆隆慶
方信川螺鈿黃平沙剔紅雲南作者刀不藏鋒稜未磨
也漂霞者隱漆也先畫花而漆之磨出者也近徽吳氏
漆絹胎鹿角灰磨者螺鈿用金銀粒雜蚌片成花者皆
絕古未有此坡曰黑漆器上有紅字以鹽擦作紅水洗

下漆器不可盛蓴菜雖堅漆亦壞周密記張俊奉獻有

餞金果壘愚者曰門朝御座方香几是鑽西漆

中履曰魚膠如

攪合縫久罅
晴開則堅

辨漆

起籠微扇扇如鏡面者點紙無暈滴沸湯不散者

無硝油見風不變色者次之諺云好漆清如鏡縣絲似

釣鈎撼動虎斑色擊之有浮漚凡黑紅黃三種大樹黑

小樹黃龍罩金漆金州漆也浙漆出衢閩黑於廣鑿樹

入蜆殼受漆取出以指蘸桐油抹下筒取者先油具筒

漆無油亦不光七漆三油可矣魚膘陰雨即與生膝膠

物水浸不壞日晒即熟絲綿濾渣

驗油法以篾圓蘸桐油如鼓面鞞者真掌

擦香油手

背香者真

催乾 崖旁土如棗外黃赤內黑濾入桐油則易乾號

曰催乾蜜陀僧以乾外此土以乾內熬油時先下催乾
後下陀僧宜以牽絲為候催乾土是處有之形家見此
為忌

窑器本末 柴汝官哥定宋窑之名也元美曰柴窑柴

世宗進御葉寘言錢鏐燒陸龜蒙咏越窑奪得千峰翠
色來則唐有矣定州白磁有芒遂命汝州造青窑器均
州五色皆汝之類也江南處州龍泉有窑政和間京師
自置官窑南宋邵成章提舉內窑號邵局最佳餘則有
烏泥餘杭續窑樞府窑之類陸文裕曰宋處州童生一
生二兄弟至龍泉之琉田窑而生一陶者百圾碎而色
淡故名哥窑以鐵足有聲為驗倣定者曰象窑亦苦無
聲格古錄曰霍州器元剡金匠彭君寶所制高麗窑似

龍泉大食窑則拂菻樂燒五色者也麟洲窺天外乘曰
我朝專設于浮梁景德鎮永樂宣德內府燒造以駭眼
甜白為常以蘇麻離青為飾以鮮紅為寶成化尚五色
炫爛而回青未有也回青出外國正德間大璫鎮雲南
得之煉石為寶者也嘉靖間回青雖盛鮮紅土斷絕而
上忽命燒大缸圍至六七尺穆宗登極詔發宣德鮮紅
式造撫臣徐拭言此土已絕只可采礬紅今上時且漆
造棋局矣礬為九江分守曾督運二缸云吉州永和窑

宋時閒至今有舒翁舒嬌之器土人傳文山時窰變遂廢建窰今在德化縣土產程寺後山中穴而取之乃大塊白石舂碎為粉澄傾石井始埴為器白土性急加泐不得滿滿則墜惟佛像滿泐者以下空也于司直曰永樂壓手杯宣德霽紅杯盤發古未有以西紅寶石末之入泐凸起者也茶罷瀹壺匾確爐瓶盤碟敞口花尊暗花坐墩皆精成窰草蟲可口子母雞勸杯曰雞缸神廟光宗皆尚前窰故價最貴嘉窰泡盃壇瓊甚佳蓋永尚

厚成尚薄宣青尚淡嘉青尚濃成青未若宣青蘇渤泥
青也宣彩未若成彩淺深入畫也其同者汁水瑩厚如
堆脂汁紋雞橘也質料膩實不易茅蔑也磨弄歲深火
色退淨也西番有乾提窰無渤作飲水器

中履曰鮮紅
止燒二缸十

二盤今盤片一塊
值百金紅光四射

磁器之渤草木汁也 愚者訛饒人皆從袁州市麻燒
而淋其灰汁即渤也其餘瓠窰亦取蘆葦柴燒之而淋
取其汁但有精粗耳瓠窰等渤或取草灰汁其黃色瓠

泐則常土坏而取赤土汁上之者也

中道曰燒芝麻稽而淋其汁以染色

則成紫淋灰以浣亦取其滑也楫曰景德鎮燒器土皆自婺源來細埴而灰色燒成乃白吳璫曰麻倉窑有土可作泐在

婺源界

窑器之青乃石土所畫也

廬陵安福新建出黑赭石

磨水以畫磁坯初畫無色入窑燒之則成天藍景德窑

嘗取諸婺源名曰畫燒青一曰無名子蘇泐泥青則外

國來者

琉璃窑 北京燒琉璃磚瓦在陽德門登豐門用坭子

土馬牙石入黑鉛燒成劉晴川魁當嘉靖建雷殿時曾
以此事費用入諫南京報恩寺琉璃塔中具五色則方
山岡琉璃門昵土所作也

黏磁器 白菱石灰為末用雞子白調勻碎處縛定待
乾但不可見雞湯粘官窰以青竹燒漚合雞卵青縛窰
破處湯內煮一二沸放陰處三五日其牢如釘定窰則

濃楮汁可粘

中履曰生麪筋入石灰久杵忽化
水可粘磁器但不可於水內久浸

舟 梳之高少舟之長五十分之一檣枰之衡為舟之

潤其底深淺視臘之稜其柁與其底平小舟之柁桿則可上可下船諺曰船有七飛禽八走獸九板一木又有寸木不見天此其概也艚以竹青油灰吳船歲一油之漢船底平江船底深梭船底尖江湖用舥艚兩廣用陽橋江湖帆在桅左廣帆在桅右蜀用布帆洋船下有直木皆重底也其用輪者古有之矣袁褰曰韓蘄王黃天蕩用飛輪八檝踏車槃回江面史紬曰劉裕曾用之舟內輪轉外不見人張燧曰虞允文采石之役舟中踏車

行船發碇

洋舫 萬歷甲辰七月紅毛艘渡閩求市沈士弘將軍遣之去其人長身紅髮深目藍睛高鼻赤足帶劍走舟上若飛登岸不能疾行舟長二十餘丈雙底木厚二尺外漚青銅之桅三接其帆用布一桅堅樹其二桅以候風之恬猛為升降中橫一杆桅上有斗容四十人繫繩若梯上下瞭遠下列發貢銃前用木照後用舵黑鬼善沒為之使此李衷一所記也利瑪竇言舶三等小者舟

腹自上達下僅畱一孔四圍點水不漏下填以石風濤
起時惟操舟者縛身檣桅一日行千里中者容數百人
大者上下八層桅長十四丈有舶師歷師將卒客商千
人江船用鐵錨洋船用木碇多則獨鹿木其縫以椰索
貫而漉青石腦油塗之

洋船釘 海鹹爛鐵且妨磁也故用鐵力木碇枕椰篋
箒竹作釘今以蛇皮內膏浸釘釘船則不妨

屋 四阿兩下榮楹楣棟必不易也椽桷拱斗承塵藻

井致飾耳棟之半為檐宇七柱則上十五宇高一尺則
光多一丈準車工尺周法也枕梁交卯輒山省翼挑坊
挂角四兩千斤謂之尺經首籤卜機中椽宜偶藏初柱
腦則破之矣喻皓有營舍法歐陽歸田錄開寶寺塔喻
皓所造勢傾西北皓曰風吹百年當正

中通曰北隅層
勢收分少耳風

無吹
改理

西方以山牆開堂門有無柱者江陵有一柱觀靈

谷有無梁殿盡頂燕窩複閣雪洞軒廊假石入者迷出

有之矣

計凌倉有園亭書多少朱門鎖空宅主人到老
未曾歸喧曰瓦深則風日難下墻厚則寒暑不

侵藉地則燥濕無涉此
居室攝生之良法也

犀角器 黑中黃花曰正透黃中黑花曰倒透黃中又
黃黑中又黑曰重透分水犀能分水駭難犀白縷如絲
通天犀具物形真宗賜冠準者犀因玩月形生角象被
雷驚紋入牙信矣骨咄犀碧色蛇角也暹羅犀皆有粟
紋角腦後有高起阜其鼻角亦佳有全黃者交趾有山
牛角曰毛犀無粟紋有花斑凡製犀角器初白久黃有
以礬入鳳仙根糟黃者或以馬蹄偽之宇文懋昭金志

言秀州周通直家有正透犀帶其中一點白以紙燈近之即時滅有濕氣疑是水犀贊寧曰此獸夜有光通天駭雞犀置屋上百鳥不敢集大霧露夜終不沾濡角為釵導辟塵若行蠱毒鄉食以角攪之無患箭中欲死以刺瘡中即沫出而愈溫嶠燃之見水怪燃水犀也薄片夾腋下碾之如粉所謂人氣粉犀也犀盃貯茶及塗胡桃油色易枯

中通曰匠作有規矩盃乳盃花草山水蘇作為佳今廣亦做蘇作

象牙器 粉紅有粟紋象之板齒有花點其曰殊角者

海象牙也紅猪牙如蚌棗色如象牙紋魚牙如象齒周
禮榆貫象牙能制水怪老象有六牙常自脫而埋之煮
象牙用醋涵煮之自軟一云木賊軟牙牙黃者浸木賊
水復白曲者直又插芭蕉中白或用豆腐滓浸擦

暄曰
量刻

痕但以醋浸
一七亦軟

海甲類 玳瑁六葉其厚而黃多有物形者貴其移斑
火板以石灰鉛粉蘸水點於牛角者偽也劉郁曰撒八
兒為玳瑁之遺精蛟魚食之吐出年深結成其價如金

龜同似玳瑁有黃甲無黑斑鶴頂乃海中鶴魚之首摩
印其兩頰之紅于其頂骨也鸚鵡盃乃螺也魚頰則火
鉗魚骨也海魚鱗厚大者亦可為飾其曰海膽者外狀
癭磊巨細不一大及雞卵亦可鑲為盃瓶之屬海杖者
長數尺大魚之鬚也交趾蝦鬚有長七八尺可為拄杖
者奇方擣驢骨爛實于柔鐵圍之同地榆五加皮急性
子煮之為器紋如象牙海槎錄曰儋州紅蟹殼形有十
二點堪作櫟子北戶曰金龜甲虫可以養粉廣州市上

甲丁虫以為首飾工人脫瑁筒等倒懸澄醋即開

火爆 火藥自外夷來宋開寶二年岳義方上火箭張和仲記虞允文采石舟中發霹靂礮乃紙為之實以石灰硫黃墜水而火自水跳出永樂立神機營西隄以尺測量精矣唐有火樹銀花想已用之耶硝入杉灰則直發硫則橫爆加黃礬則研烈若瓢灰則悄聲礮西匡石粉則發時不先光試之堆相間丈而點一及諸堆者萬杵者也掌上燃之毫無所傷以其疾也入鐵蟻撞腦則

成花今名烟火禦銳者濕絮魚網土囊柔能制剛也岳珂程史曰汴城舊多曲折蔡京方之尼雅滿沃哩布視城而笑植炮四隅隨方擊之城既引直一礮所望皆不可立矣魏子一曰敵臺宜築三角附城如菱葉兩腋皆有小門可出而外礮不能攻也城址砌石上即以土築之礮子入土便陷不出

暄曰末乾
礮可代礮

剗厠法 以旌德拳刀手為上畫楷行草方能生肖金陵江廣皆雀刀閩用挑刀梨棗白棗以油漆之黏橐後

洒石灰潤水去瓢點畫分明易于下刀刀貴闊淬以得

洋鐵也

中通曰雖梨板亦止印二萬篇則糊塗矣故須煮板能久但下刀難耳暄曰用石灰鹽煮易剝

耐久且不生虫

呂宋鼓

呂宋新貢之鼓以藤蒙其面擊之聲顫不已

又見方面鼓田獵用之古以雷擊牛死之皮為鼓可以

威遠辟邪

中通曰楊弱生親見之

醒鐘

捷鐘者先醒鐘輕椎得聲然後重椎則聲發而

鐘不覺鑄鐘頂留孔其多孔者鐘聲亦發磬則氣上出

鐵磬亦留三眼諺云磬畏茆茹

商嵌銅器以肥皂塗之燒赤後入梅鍋爍之則黑白分明

金剛鑽 金剛鑽鈍置瓦上燒赤復銳小者黑大者白抱朴子曰生水底如鐘乳體似紫石英惟安南高石山一角羚羊能碎金剛石東璧曰白獐骨能碎之而鷹羊角亦能碎獐骨周密云如鼠屎青黑色鷹隼粘食遺糞而人取之者訛也獨孤滔曰紫背鉛能碎金剛鑽虛舟

曰細島砂能磨之使之長方成鋒即金剛切玉刀矣有極大者瑩白放光香山隩首勒嵌之以此競貴十洲記西海流砂治昆吾作劍如鐵光明如水晶獬熊舐鐵糞可鑄劍駝火鳥糞亦然故周密說不明耳凡寶石真者必堅皆能刻磁好水晶之稜亦能刻磁

真鐵刀 繞指鬱刀也以銀和純鋼百煉之即可屈而放之即直呂宋有來者

淬刀法 山間水出而殷者曰繡水淬刀刻玉地溲也

一曰虎骨朴硝醬刀成之後火赤而屢淬之一以醬同
硝塗鑿口煨赤淬水一以羊角乳髮為末調傅刀口不
必蟾酥塗而自然灰埋也舊有詩曰醬能雕白玉鹽可
濯黃金移門廣牘曰地榆一兩葱蒜汁各一盃同煮二
時便可容刀刀生銹以木賊草去之或用炭磨若新硯
塗礪鵜膏則不生銹

中通曰服玉者以苦酒地榆酒消
之為水苦酒者醋也是醬醋可刺

玉瑄曰塗藥煨刀
必堅鉗否則偏

藏針 粉包之或燒石灰虛舟曰胡桃燒灰可藏針或

曰石灰收針不滑宜以油抹用頭髮收

料絲 滇金齒衛用瑪瑙石英屑汁以北方天花點之
乃凝練為絲以作燈李西涯書作繚絲大內青瑣即此
物亦能假琅玕珠謂之瑟瑟閩中乃以鉛煉永昌燒圓
棋子亦以鉛料絲磨漿能止血破血猶之白定瓷末之
能止鼻衄塗瘡癰也

近丹陽松江
能作料絲

沙壺發光法 先掘土坑下置沙盆乃以細茶多用沸
泡壺中置沙盆上復以沙盆蓋之上覆以土七日起之

如此者三壺放光如鏡矣

忍蠟炷

黃蠟松脂槐花各一斤浮石末四兩一處鎔

之用燈心布澆一日夜僅點一寸此王西岩方一曰槐

角倍白膠香硫四之一鎔化一處以小竹筒置一竹心

將藥灌之候冷去竹

中通曰以綿紗繩澆蠟則屈曲收之隨用又聖燈法浮萍瓦松遠志

黃丹蛤粉等末每油一兩入藥一錢點燈可照一月之久口外人以桦皮卷蠟作燭與山民燒松節竹片何異

燭 玉山柏油加蠟最堅他處柏油蓋蠟過冬則暗矣

木天蓼子亦可為燭眉公曰蜀葵點作火把雨中不滅

川井油點火不畏雨何必洞冥之豹髓錫屑蘇油乎羊
脂燭無烟明角燈宜之蜃脂為燭烟成樓臺內方曰乾
漆海金沙火硝硫各一兩黑豆漚青黃蠟各二兩鎔化
以布燈心作條染之風前不滅一曰止用蜀葵楷風中
不滅

止燭瀉法 郎瑛曰燭心散以線縛之愚者以鹽補則
瀉止或以筋倚之

兆充曰燭用臘水浸
過雖三伏日不瀉

補漏 缸裂縫先箍定置烈日中加炭燒炙其縫乘熱

以好瀝青塗罍則不漏近亦用鹽生補又鹽可擦碗酒
瓶漏者羊血擦之油籠漆籠漏者以馬屁字塞之即止
劉伯溫多能鄙事云油籠滲漏剝穿山甲裏面肉鑿投
入自至漏處補住又云木香塞醋桶漏醋調粉成泥塞
鮐桶漏又云陶缸雖厚灸以艾鑽之即徹

中履曰磁瓦
屑合艾榆補

漏椎生黃豆與
瓦屑可補鍋

香爐灰 米湯和紙灰晒乾煨紅研之三煨曰滿爐金
或一斗加礦灰二升煨之尋常燒柚皮千張灰足矣冷

爐以草紙茹楷炭埋之火亦自活欲畱宿火者胡桃燒

半紅煖灰埋三五日不燼

中履曰茶油餅滓入爐常燃水經注盧水聖子木炭不滅

香炭餅

炭末一斤針砂四兩

唐針之鐵砂

擣蜀葵花棗肉

為餅乾之歐陽公言蔡君謨欲清泉香餅清泉地出石

炭為香餅終日不滅其作脚爐炭塹采蜀葵葉擣麩炭

煤炭末以化開石灰之濃汁和之鐵圈捶實暴乾

中通曰江

南細枝炭曰煤炭非石炭也蔚州石炭終日不滅

獸炭

炭與鐵矢等分合擣入芙蓉葉十之三再擣和

糯糜範獸形乾之韝紅入爐信宿不滅

止爆 燒炭若爆洒鹽自止此以炸止炸也

燒炭忌構 五構柴燒火無焰成炭之後忽然自燒故

炭窑忌之榕亦無焰然其枝曝為點火繩八月割茅燒

之有聲汁力也九月割則枯矣巴菽瀉松脂則松柴無

焰 中德曰搜桃燒之澀鬱不著標炭以畫墨而燒之則
有墨處著無墨處不著凡墨不著者加硝黃暄曰燒

炭而隱以
沸水沃之

落竈煤 竈中燒皂角烟則鍋底煤與突煤俱落

無烟柴 伏中劈松柴黃泥水浸皮脫晒乾冬燒無烟
竹青亦可

窓紙 簷窓畏漂雨用桐油則耀目當以豆腐漿塗之
此漿亦可糊紙廣牘曰五桐六麻不用煎二十草麻去
殼研光粉黃丹各半七桃枝攪用似神仙

卓影 陸荅菽園雜記曰卓影辟邪永樂間外國所貢
如小團扇以金黃絹裹之張瑤星言罩三矛于內觸之
有聲

案匣 鐵力木初黃用之則黑其性濕赤身依此書案
能使脉澁粵以作柱南風天則出水惟花櫨不生蟲然
作硯匣不宜硯貴漆匣也案以櫨榆栴榔擦漆為宜

曰薄漆初上即擦
去之易于水磨

烏木 烏關烏楠木有榔枕木有生枝者市以醋調礬
灰塗柘木經宿黑燒胡桃殼熏木復以油胡桃擦之亦

成烏木真者沉水

吳彊曰荊蒺木砍之浸泥中
即成烏木中履曰即今荊柴

溺器 用久者搗生韭一握入其中滿水閉之仰置一

日許垢隨水傾出

芝穎云新溺壺從不見水則用久亦無臭氣暄曰中所結白塗可煉秋石

樂及損

棺棹

老杉出油斑者川為上閩次之皆以土壅杉而

成柏桹等皆可用然有旱棹水棹以油結為主花香其

驗也以指甲劃之起白霜者佳物理所曰棺有殯出以

多年歷日紙糊之又曰琢釘及漆棺止哭哭便漆不光

又曰古櫬板作槩底合陰陽通神其細腰木辟邪瑾戶

愚按江淹曰古棺用細腰後用銅釘如今拓釘形儀禮

註如今則子猶言銀錠形也

油蝕 桐油烟蝕漆棉花油烟蝕桐油屋器新油新漆者忌凡洗漆以香油洗油以膠

洗琉璃 琉璃用醬湯洗油自去不可水洗見水則不圓久之即壞

煮新銚 凡新瓦銚用黃泥塗其中貯水滿煮一時方可用

露臺板 蹇漆樹削針米泔浸之待乾釘板易入如鐵

水磨諸器法 水磨用麤葉後雖滑而無光必以陳壁石灰揩之乃可照人其以油調石灰塗一宿明日光之者曰烘油蠟布蠟刷乃功成之後用之凡竹器暴之火烘出汗而拭之則光

麤炭之用 水麤炭缸內夏月可凍物又曰麤炭坑內安猫食夏月亦不臭安宅書曰鋪麤炭漫墻永不潮濕而蟲蟻不來收茶洗硯皆用之

暄曰麤炭漫墻可辟濕瘡腫毒諸病

瓦色 泉漳間以海風能飛瓦奏請用筒瓦然皆淡黃

白色凡閉窰而水陰其頂即成青色廣東瓦色亦其土也北琉璃窰坏皆黃色

甄屑重燒至堅 淘泥細磚屑之與麴沙合器則火燒不壞山中大火爐宜作此而以金鼎火成之螻蚌至堅海南以砌牆粉之築沙土尤堅

去斑 熱盥足盥漆桌成跡者以錫注盛沸湯衝之其跡自去或置星露下亦去故治汗斑者以綠布夜露之早以貼身則斑隱

酒杯無酒氣 茶杯飲酒既乾以氣向杯底吹之盡力
則杯全無酒氣

畫磁 周密曰金花定碗用大蒜汁調金描畫再入窑
燒永不脫凡碾工描玉用石榴皮汁則見水不脫

薑磁止爆 薑汁塗磁杯乾之又塗極厚而止火之可
使盡赤而磁不爆碎

明角忌龍鬚草 明羊角器置龍須草席上邊即蝕有
白暈

刀血火青 刀蟻馬血火煅之色青

辨古銅器法 銅入土千年青入水綠千年瑩如玉午

後翠欲滴蝕處如蝸篆或蝕薄或鋤破並不見銅色翠

綠徹骨或有一線丹然尚有銅聲傳世古則紫褐而殊

斑沸湯煮之斑愈明偽者漆調硃也或塗汞錫加醋調

硃蘸而浸水變色者熱手久摩銅腥觸鼻矣

井水調泥
蘸浸一周

時再烘熟銅器上三度作脚色候乾却將硃砂浸化淨
筆蘸上刷三四度候日餘洗去過乾即洗全在調停水
洗候色若入地窖藏之即生硃砂斑欲其色沉以竹葉
烟熏之泥簪兩度俟半日許鎔又頻浴之即為茶褐色

物理小識

四十一

古銅聲微而清新銅濁而闕或割口鐸之其聲變者至
鼎彝尊觚卣觶商金銀等款識博古圖詳矣博山下象
海水收香也古綠匱洗可養目秦鏡厚而背光照之神
清辟邪多水銀古海燕蒲萄等則漢鏡也香爐畜火莫
如宣銅宣廟命工煉十二次鎔下銅格謂內殿災金銀
銅像渾者非也乳爐最宜魚戟鋌耳象鼻獸面皆佳竹
節翻環索耳分檔下也有鑄耳者有鍍金者有雞皮者
初做宋燒斑或蠟茶末年淡者乃妙望之黯然迫視如

肉內色蘊火其中彩爛善變偽者銅氣自新光不從內發也嘉靖初有學道鑄後有施家鑄惟以銅重為價蘇有蔡鑄南京有甘鑄先宵煉銅畧變其色日夜蓄火十年則亦可觀矣陳旻昭言周鳴仲王越石孫淮橋以一年見文王鼎分而為四而主人亦不知其真贋也不可不知虛舟子曰器不過適用而已求之甚精而顧以好古之目亦為隱賑者化其俗耳噫天道好還且今富貴之子以此揮霍何非閭體天道之一端耶盧坦之對杜黃

裳是也觚不觚錄曰畫當重宋而三十年來忽重元窰
器忽重宣成價增十倍大抵吳人濫觴今陸子剛之治
玉鮑天成之治犀朱碧山之治銀趙良璧之治錫馬勲
之治扇呂愛山之治金石小溪之治瑪瑙蔣抱雲之治
銅皆比常價再倍嗟乎大臣無所嗜好價自當平焦澹
園曰道無形而器有象如犧尊之重遲雌敦之智辨黃
目之清明山罍之鎮靜壺尊著尊之質樸使人指掌而
意悟目擊而道存皆有不言之教焉故曰古之君子不

必親相與言也以禮樂示之而已至若柱爵懲濫饗饗
戒貪山觚防湎觸事著警凡以成德而礪行抑其次也
原父謂禮家之制度小學之文字譜牒之謚系靡不有
資猶為末務乃上不能契道下不以飭德而特為耳目
之玩則宣和君臣之失也適足為戒而已

剔頭不用刀法 石黃石灰硫黃各一錢研末水調塗
髮一時間但用振子刮之即下

起棺法 棺已釘油桐木楔楔縫釘即起作作用此法

欲門開有聲法 以杉木炭安樞臼中

暄曰欲無聲以水濕之

擔水止沫法 擔水攪者恐其沫之躍也編竹木為十字浮其上則躍沫不出

化廁蛆法 廁中投青礬三四兩糞化水投蓴菜蛆死
用水法 凡伐木宜四月七月則不蟲而堅勒榆莢下
桑椹落亦其時也至于木之有子實者候其子實將熟
皆其時也凡非時之木水漚一月或火燠取乾蟲則不
生伐木以桐油灌之即乾買大松者貴其色賴則鑿腦

以蘇木胡椒灌之通身皆紅

起重法 以剛鐵作蠡絲旋旋入與鐵方基中既成二物牝牡相合左旋則入右旋則出乃以承重物先左旋則縮之後右旋而伸之其漸長處寔之以楔如此屢加則起矣凡引重用一轆轤省力一倍以筒筒圓木入滑汙其中以繩卷筒上其力更省宋治平中河中府浮梁漲絕鐵牛投河募出之者僧懷丙以二大舟寔土為木衡以鈎牛乃除其土舟浮牛出轉運張燾以聞賜之紫

衣

暄曰稱象者
曾做此法

稱杆輪運 凡運重石先立稱杆以木作架架立衡輪
下復以輪轉之隨所置而審之其省力多今之樹牌坊
造橋皆如是也智癸亥隨老父在都見運皇極殿磬高
濶以丈特築黃土於御道以衆繩牽之不用下輪者內
司利于糜費也

轉水法 其來處何高則所激之高可與之比或故使
之瀑下就以筒承瀑則水激而上上出上既出則流通而

不止矣如今過山龍之出酒也然水器宜精密勿使洩
氣初引以氣吸之器大則以火生氣而抽發之昔漢靈
帝作番車渴兔註云渴兔為曲筒以氣引吸上也則漢
時中國已知此法矣池塘中用筒激水亦可高數丈而
出之或下用輪激此須制具如東坡所云蜀井用竹筒
抽汲之法凡井皆可為也灌田急宜講此水碓礮南方
類為之漢杜詩魏韓暨之水排是也用風帆六幅車水
灌田者淮揚海埂皆為之

暄曰遠國用轉龍逆流水以
為已下也而不知其已上也

與抽汲過閘機沫成
并諸法皆稱奇絕

運機 不因流泉不因風轉而自運者有機焉縣甬而
開小流則漸輕而上其機亦轉有積沙以壓之而漏之
者此外則因乎始動而發華陽國志一士獻木牛流馬
于諸葛者是也錯鑰卷轉七輪交催約處十二齒大者
同天度自張衡一行祖冲之皆能作平儀運機自動蘇
鶚載新羅獻萬佛山木人稽首其機在鐘楓窓載太平
興國中張思訓上渾儀七人值七政十二神直時皆以

機發魏朴馬鈞俱通此亦人自悟耳孫孺理寸自鳴鐘

乃訝之哉

龍溪孫大娘稱奇工

築法 蒸土雜秫則推不能入此赫連築統萬法也凡滑條瑾土入炭屑瓦屑皆極堅後可旁燒先不必蒸也麟州城中無井惟以沙泉在城外欲包展城之其地善崩謂之抽沙熙寧中呂公弼令鄧子喬視之喬曰古有拔軸法謂掘去抽沙實以炭末瑾土則城可築如議城之果堅不陷一曰以千年木釘椿則為力更省松栢皆

可數百歲不壞



物理小識卷八

欽定四庫全書

子部

物理小識卷九

詳校官庶吉士臣汪彥博

員外郎臣牛稔文覆勘

覆校官編修臣汪鏞

校對官學正臣常循

謄錄監生臣朱清渠

欽定四庫全書

物理小識卷九

明 方以智 撰

草木類

松 埤雅命根遇石成偃蓋蘇伯材去中根留四傍以
造之香花有甘苦二種皮薄而白者甘皮黑者苦巴豆
瀉香勿服也沙澆茅蒸酒煮數十次如牽糖法則白矣
五鬣七鬣為一朵葉者剔牙栝子松也兩鬣而細則常
松也栝子松膚青內長而外遂浮脫結一房數十葉一

葉毬一子子殼內有仁甘美滇南種子色黑遼子色黃
其性喜乾初種惡蟻其濶辦厚葉者羅漢松也樹老結
實長四五分底平上銳色紫黑乾之味甘補腎其香益
肺本草綱目所未載也高山石巖水松亦數丈葉如簪
盤如菊而厚夏結子如豆大赭色亦所未載也

南岳天
臺落葉

松一名金錢松天台山亦有落葉松本
草水松水中苔也閩水松乃水楊之類黃山武功千年

松高寸許石上草耳

中通曰種松有流脂不止者以大
糞塗之即止中履曰采臣言遼北

松塔高數尺履按既
未臘國松子如荔枝

茯苓可種 松上結苓則下有茯苓 策傳曰雨霽无風

夜燒兔絲罩燭而火滅者明即掘之本草載泰華終南

而今貴雲南苓堅折松之榧曰茯苓撥錐刺地不可拔

者掘之離根皆生近有拚松柴種苓者畱椿三尺切茯苓

置根下其松氣液不上則下注五年遂如拳矣

中履曰楓

之猪苓竹之雷丸猶松之茯苓也多年則堅餘氣傳精即此可信 暄曰採者椿上揭皮易開內有白膜則知下

已結
苓矣

栢 埤雅曰栢性指西猶磁之指南也擦栢葉小而歧

翁栢即側栢瓔珞杉栢可寄枝刺者檜也栢利於造船
敝斧為合香用宜以子種

桐 剛桐油桐也櫟桐青梧桐也宋詠謂二者作琴非
也琴用白桐乃泡桐也世傳桐斲地脈乃油桐也油能
殺蟲枯木有多年結子者有三年結子者南方有賴桐
刺桐泉州號刺桐城海桐可為藩障可接楊梅別一種
也

杉 杉貼不宜水壤種之亦發然挺茂不久焦枯也溫

杉葉細刺杉葉粗一種桹木似杉而硬宜芒種時遇雨

斬肆插之廬山大林寶樹即杉松也

暄曰閩有水杉葉似垂栢其材刺之

可卷作甌盤等器
名曰捲木甚輕

棟樹 棟為器不裂聯子密種則駢結如垣牆然宜芒

種時有成紫花者其子浸臘水貯甕中至夏月滌器蠅

永不近取其子曬乾雜冬春米內不生蛀蟲居家必用

曰黃棟芽可為木蓼

乘雅曰獬豸食之火獸也喜其潔蛟龍畏之木蟲也激其怒

梭 枌櫚春種子勿栽之太早木盛時春秋二分各栽

六葉其子未透而苞者名曰木魚肥穉堪蒔東坡云贈我木魚三百尾畏雞糞經之則朽

桑 春斷枝瘞之生條臘月迄種平其根翦去俟次年離跗四五寸翦去後年亦如法翦始成木灌宜鬱栖不宜糞桑根下埋龜甲則茂盛不蠹擣桑條宜燥土則根易生溼則條爛矣抱朴言桑為箕精能助藥力愚按夏季取桑柘火以木黃而綿則火氣長故利關節拔氣奪邪也惟燒肉忌桑柴

火蕉 日照火蕉則其葉上脊縫一條無影而兩傍垂
翬者有影月中則皆有影燒釘釘之則茂彼火性盛故
合日也厭勝謂之辟火千年則結棗大如瓜凡數十年
而花數十年而實

木蜜 名枳椇木不宜近酒室使酒味薄材作枕醉者
易醒語曰厲漢指頭中州呼拐棗一名椹構

鹽敷樹 生五梧子之鹽敷樹燒炭而火性不死少頃
於炭中復焰故燒炭者簡去此木虎被藥箭尋遇此樹

食之則毒藥性解後魏書云勿吉國水氣鹹凝鹽生樹上今按真臘國有咸平樹山海經橐山多楸郭璞注七八月穗有鹽粉可酢羹是五楸也

槿葉樹 物志謂之枯條葉性澁可以止滑一名樸樹其子可種即白駸木榆類也葉沙磨器細於木賊蠟梅葉亦沙可用

蠟樹 水冬青葉細於女貞五月養蠟子七月收蠟不宜盡采至來年四月又得生子其蠟曬乾以越布蒙甑

口置蠟布上置甌釜中水沸蠟融入器凝白可為燭材
其滓以囊投熱油中則蠟盡油遂可為燭凡養蠟子經
三年停亦三年或伐木旺生新條養一年停一年江南
有水蠟樹則不似冬青至冬落葉又一種也蠟燭用柏
油者堅又水槿葉細花黃一名水梔冬斬條插易成大
木可以放蠟即水蠟一類

中通曰嶺北蠟樹初生
葉近紅老則皮節香

柏 烏柏宜接其子外白膜蒸鎔之凝為燭材其子內
肉杵榨之為清油然不宜食以之逐水則可

堅木入水不朽 墨是可有堅木曰則獨鹿入水千年

不朽利未亞堅木有文入水土不壞勿搗祭亞之國城

建於海中亦以千年木為樁約皆椰枕類也顧玠曰初

栽椰用鹽一二斗置根下其木最堅偲儻木漬鹽水中

百年不朽

中道曰穆公云字露有樹生脂膏極香烈名拔爾撒摩傳諸傷損一日夕肌肉復合塗痘

不癢以塗屍
千年不朽壞

榆 榆長則皮脫甚潔其材綿而堅其汁滑有倒垂者

据榆則粉屬也北方食其莢有小樹似烏飯葉而背白

潤其紋可照啖之最滑如犁頭草嶺北號曰小榆盧氏
曰南方無榆而有杉愚按無北方之大榆耳柳榆山榆
皆有山榆即梗其實曰無莢

梓楸 梓種於林則令諸木內拱斷根瘞之遂長條枚
取以分種或曰櫟即榎也爾雅大而散楸小而散榎臘
月種之材理有雲朶紋物理所云梓木為柱在下則有
聲云木爭位又曰梓木為舟起蜃造船不用

枏 枏宜臘月種子赤者材堅子白者材脆年深向陽

結成旋紋者曰鬬栢楠又一種曰石栢可辟白蟻

栢 栢即柞櫟伐則灌生而葉大可包物也其斗為染
皂材俗名黃栗可為腐夏統采栢杜甫食橡皆一物也
又或書為櫛而後分之櫛平聲

櫛 小葉似茶木色似栢少黑結實小狀似栗棣蜩自
裏味有甘苦二種可作腐食材最堅白蟻不能齧

中履
曰江

北呼圓櫛金
陵人呼為櫛

楮 楮易生其汁最黏其實補人其皮作紙一名穀或

呼為構舊說雄葉無極愚者曰葉肥則圓瘦則極然一

樹而有極圓何耶當以結實皮白為雌皮斑無實為雄

或呼穀桑

中通曰楮子麻子同撒秋冬留麻為楮作煖來春刈麻放火燒之楮乃盛發臘月斫皮其

薪梗可

楓 分根側條種脂為白膠香忽生瘤為楓人深山傳

有不落葉之楓則樹似楓而開極者其中仍多兩極或

不開極者韓雨公曰楓松皆可造乳者鑽入莖巴菽可

令成瘻張程曰箕峯有楓開兩歧紅花其葉莖亦紅

槐 材堅其芽可芼結子角如豆可種其花葢和灰蒸之供染初生槐弱以麻脅之其倒垂槐曰龍爪槐枝脆靈谷寺門者是也爾雅注葉大而黑者曰櫟槐葉畫聶合而夜炕布者曰守宮槐雜記曰老槐生火膠撓水則清

椿 樗櫟疎而臭其葉脫處有白故樗蒲錦以此稱之椿木實色赤而葉香芽可茹亦可生食根側分小木種之其材為船底不利為船臘則稱為梁燕不來虛舟子

曰以柏作東戶而椿楣其上則爭位有聲

楊柳 喬者楊弱者柳楊有青白赤赤近水生根須可
剝以護墻堤柳有大葉長葉倒垂者曰宮柳臘月斬大
榦燔下焦而深插之梯則歲可髡而復條肆也諺云根
宜焦埋到腰一株死有百株楊青白髡頭赤須長膚青
白者材可雕刻又名檉杞柳白皂葉亦似楊材供剝剝

檉葉染皂
材中切版

柘 柘葉可飼蠶其絲為絃清響隔年不採者春再生

必毒蠶故夏月宜擊脫之柘木以醋調礬灰塗之一宿作間道烏木

樟樹 春易葉初秋復發葉子見霜黑可作香韶州鋸

之升腦江右名豫章而不取腦其土別乎豫章老則出

火自焚種不宜近家室

矮脚樟即烏藥冬不凋結紅子名雪裡紅

漆 漆不取液則自斃惟霜降後取者良樊重先為人

嗤後得其用者也種宜臘月朝鮮國有黃漆樹似棕六

月取汁漆物如金今廣漆則黃江漆則黑

中德曰舊說五更露中取

漆可以多得日出則無漆矣凡取漆者耗神

草木膠

金漆裨漆之外有猫頭刺汁以犒雀雞腸草

汁以黏蟬友楮榆皮滑條皆黏粵有石葦如蒿苳而肥

厚邊有鋸刺女以膠髮又有霸王鞭刺作籬斷汁甚濃

猶澤漆如蘭薜荔之斷汁也蜀羊泉即漆姑野蜂采汁

為巢蒂者外域塊香皆樹汁也樹汁皆可煉膠

中通曰入漆者

油其手合糖者水中為之

皂角 肥皂子短而肥色紫皂角長如刀色黑木有長

刺名天丁猪牙皂小如猪牙色黑香皂子圓小而香色

白四木形葉不相似惟子气味同取皂以篋籬樹加楔

之則皂角盡落

中履曰皂角不結實則鑿孔入鐵五斤泥封之次年實倍悟知皂角入鍋爆落

圓相感相制而用也

黃棟頭 黃棟頭樹分葉如椿大者合抱春采其葉味

苦而甘一名回味可治痢而治霍亂尤效皮可合香本

草綱目遺此未收

俗訛呼黃連頭

椒 椒气下達無花而實精勝在膚須燒地潑醋隔紙

鋪椒以盆覆之謂之出汗孟詵曰五月食椒令人多忌
而生地椒紅丸服三年則精自秘吳猛有訣局方有詩
證之但今江廣土椒閉氣川椒口白其目黑光如漆有
蔓生者爾雅所謂椒擬醜菜也秦椒大如指開六出白
光櫻也胡椒出蕃國亦係蔓生有白色者或曰即畢澄
茄酉陽言胡椒結子相對葉晨開暮合合則卷其子於
葉中

中通曰椒喜麻靱灰糞土忌水浸根以髮纏樹根
或種白芷生菜皆避蛇食椒中履曰中秋後晴天

帶露收椒陰一日
晒三日則紅而裂

梅 有鶴頂梅消梅冠城梅皆實大五月熟時梅有六月熟者早梅四月熟冬梅花白實小有玉蝶梅綠萼梅紅梅再接即重臺春分前秋分後接用桃杏體及本體紅梅白葉一花三子曰品字梅紫梗疎條蠟梅別一種其磬口者佳芒種時種其子

桃 金桃金色上有朱點銀桃白王母桃半斤桃鷹嘴桃綿桃皆甘其矧者曰瑞香桃皮黑肉脂曰墨桃無毛曰杏桃有匾者緋桃正紅孩兒桃肉紅瑤桃紅白間

碧桃白皆有千葉千葉者不實春分前秋分後接於本
體畏水十年脂凝而枯刀剗而流之又延十年深山有
山桃四月花燕有玉桃則實似櫻桃而肉紅色者外域

有桃大如斗者其核充蟠桃核

謝肇淛曰黔中日
月桃一枝分紅白

李 有御黃李金沙李蜜李青脆李白李紫李早李晚
李苦李李直方以綠李為首號曰嘉慶今嘉興有醉李
古云樵李以是名耶分根種接與桃同壅宜豕通埤雅
云性頗難老老雖棘枯子亦不細大名府南樂縣有枝

頭乾如李而乾熟於樹肇慶有沙棠果則如李而無核者也徐勣曰惟李核無仁古謂王戎鑽李核殆寃

櫻桃 深紅紫者早熟淺紅遲熟曰蠟桃月令仲夏含桃薦寢廟則早熟也枝節間有根鬚下垂春前插之子漿時得糞氣則易熟潤州櫻桃核而不仁其曰脆櫻桃則郁李也信陽州有半紅白者曰瑪瑙櫻桃

柰林檎頻婆椹棹 柰有紅黃白北方呼火刺賓陳子良曰大長者柰圓者林檎一名來禽俗名花紅紅多曰

海紅頻婆果似花紅而大燕地如拳可留至夏此種秋
分後接以棠梨春以草棉縣於枝端樹易生蠹秋前藏
木杪可剖之過時則入根附矣關陝楡栲木如林檎鐵
梗棠而花白綠色其實似榧但膚慢而多毛慶陽楸子
似柰而小同林檎擣汁熬為果單

枇杷 以葉長而名接則核少不接者壽壅宜水淋淡
草灰不宜糞穢向以為盧橘按相如賦盧橘與枇杷並
稱則非一物矣肇慶優曇鉢似枇杷無花而實粵閩黃

彈則似枇杷而無核枇杷核能去黴垢故能化痰

楊梅 紫者楊誠全所謂玉肌半醉生紅粟墨暈微深
染紫裳者也白者揚州所呼聖僧也春分前接用海桐
壅宜水淋淡草灰吳下者大贊寧曰楊梅核碎必八塊
北戶錄曰潘州有白楊梅俗以火酒浸之

蕉 容齋五筆曰蕉有四色廣川一種數年生如大樹
長丈餘赤者名崑崙蕉嶺以北皆種之曼倩神異經云

甘蔗節蛻蟲即甘蔗

生汁寒煎糖熱少食糖水
甘養胃多食則動濕熱

蕉子 閩粵版蕉結子大而味淡佛手蕉小而甜有羊
角蕉牛乳蕉有四季結子者生食甘冷蒸而乾之最佳
開紅花曰美人蕉嶺北即不易結子蕉皮可為布葉蒸
而乾之可以宜物

全人曰裁蕉花
頭則結實大

蘘荷 升菴謂蘘荷即甘露以急就注也東壁謂蘘荷
即子虛獐耳而不知獐耳乃芭蕉之轉聲也蘘荷似蕉
而小又似蘆稷三月開紅花夏結綠刺房內有黑子其
根似薑可菹蛇不喜此故又治蠱

山茶 紅白寶珠肉紅曰楊妃有磬口皂口黃白四季
者可以寄枝白曰玉茗坡詩葉厚有稜犀甲健花深少
態鶴頭丹咏寶珠也馮時可滇記滇多茶花大於牡丹
木高十丈餘沐府有寶珠樓又一種曰茶梅其萼如山
茶而小凌冬不凋

海棠 梅聖俞云胭脂色欲滴紫蠟蒂何長咏垂絲也
可寄枝於櫻桃坡詩日暖風輕春睡足咏西府也臘月
間插之亦生其不花者以已花之木為鍼內其根跗則

花矣鐵梗有四季花者貼梗叢生洪适咏黃海棠李詠
曰冬至以糟水澆海棠根則盛而鮮壺中贅錄曰世謂
海棠無香蜀潼川昌州海棠獨香賈耽言大足縣產者
香

金松 台州金松垂條結子如碧珠三年子乃一熟每
歲生者相續璀璨相間子治腸風

木筆玉蘭 木筆即辛夷宜斬條插之玉蘭即木蘭大
理府志木蘭花樹高大花如蓮有青黃紅白四種白香

山言忠州有木蓮花王元美謂即玉蘭智按玉蘭春初開木蓮四月花蓋亦有別五雜俎曰木蘭去皮不死

橘 沙橘大即福橘衢皮薄球橘最美又有蜜橘小橘穿橘太湖朱橘小於福橘而甘同之又有綠橘匾橘小為金橘又小為金豆柑有香柑甜柑蜜曇柑牛乳柑波斯柑青柑廣柑酒柑若佛手柑則香櫟香橘一類也皆以四月前接接宜枸橘畏乾喜豕通而易生蠹蠹化蝶蝶胎子還育於樹為孩蟲必探去之浸鼠溺坑中浮者

埋橘下則茂涅槃經如橘得鼠是也臨江買蟻養於樹
下蟻自能食其蠹柑初生如豆亦多落下收煮其苦水
糖蒸作果頗佳橘餅則旋去外皮裂去其核煮去其苦
石灰水浸之復以糖煮成凡柑柚橙之青時皆可為青
皮化食下氣中履曰橘蠹青色口吐紅刺岐頭入醋中亦可抽絲張荀仲曰接四次則橘無核虛
頤曰橘種子者不結實實亦長俗呼柚子廣柚則圓大

枸橘 枸橘穰絢間溝泥種成捌髡頭令發肆棘鍼成

屏翳

中德曰枸橘與枸櫞葉嫩時皆可作茶

石榴 有紅花肉紅花四季花並蒂花黃花白花者芒
種取小版插之雖深暑烈日中亦宜淖以水糞以石置
於枝間則結實虛舟曰榴宜骨磊其下五色線曰石榴
宜石膏糞恐是骨石之訛火榴則宜盆翫者也

曹州四
榴圓尺

餘品 榴內
止十八子

木瓜 埤雅曰楸木瓜百益一損翦紙作花粘實得日
露之氣乃紅其文如生一種香粗色黃生壓汁和玄參
甘松作溼香秋分後根側分小條種之喜陰喜肥

廣志
木瓜

枝一尺有
百二十節

牡丹 高簇曰樓子單葉曰山丹可以芍藥七頭接之
非社前即中秋可多須淨洗其根酒洗尤妙神隱日記
取南枝栽勿足踏也如種子六月取黑而沉水者拌土
盛至八月種之來春生芽凡澆牡丹水不喜多春宜間
數日秋不宜澆若知有蟲以白薇砒光為末布於根下
近止以生柏油入土寸許蟲即死譜有鶴翎鹿胎檀心
粉奴魏紫姚黃百餘名愈接愈幻霏雪錄云張茂卿嘗

接牡丹於椿樹之杪開時燕客推樓翫焉入藥用紅單

葉者

余全人曰漳潮不宜牡丹有掘土
這之者現蕊尚開明年即無花矣

瑞香 有黃紫白樓子串子者又有一體紅白者帶花
枝於背日處或秋插水稻側生根迤種之候延慶曰廬
山出瑞香麝觸之萎惟淪茶灌其根則不為蟲所觸結
香似之但可作紙

桂 官桂四月花無實其樹高數丈出邕交嵇含曰桂
自踞嶺為林葉如枇杷葉鋸邊表裏白毛者為肉桂臨

崑如竹其葉似柿無鋸齒者為菌桂其秋開者木犀也
以木肉亦有縱文凌冬香辣故皆以桂名木犀有結實
者四季開者無實而冬季花尤繁王麟洲言有子者桂
無子者木犀訛也木犀結子如豆今呼月桂木犀呼巖
桂不宜灌糞花時遙屈其條壓土中能自生根亦可以
冬青接寧都赤面石桂葉乃大五六寸四圍鋸齒如刺
張邦基曰湖南呼九里香江東曰巖桂浙人曰木犀引
王以寧九里香詩為證郭青螺曰西昌山桂二月開白

花叢開其香似月季花樹近於木犀江北謂之九里香
其葉似禾樹冬不落新安謂之春桂色有紅白二種紅
者肥而稀得性喜野而畏俗人家植之九死一活智按
此九里香非一種矣

胡桃 胡桃十月種宜大石重壓其根使實生子不脫
落其核外肉最爛手皮其核分二瓣者山核桃也占卑
國出偏核桃形如半月

橄欖 青橄欖無仁烏欖外肉杵碎乾放則自有霜堆

起如白鹽曰欖醬取時開孔納鹽則欖自落魚最畏之
嶺北一種似大欖而圓摘餘甘子形似山查而味似橄
欖

栗 房駭栗零種其栗楔

中枚方匾

他日生栗豐滿一曰和

栳種之易結而大芽茁三年即實成樹後根下原栗尚在
橡栗亦然他木之核則爛矣當取去原栗諸暨栗大
如拳必接乃大茅栗錐栗皆可接也埋栗臍向下彼自
生而向上故眉抹其臍招臍吹氣則不爆而臍易脫固

其理也

榕 閩廣多榕垂條及地則復成根久則擁腫因名不死木桂林有榕樹門長溪有榕樹菴為薪無焰但細枝爆乾可為火繩范正敏曰衛西榕幹大如屋韓少卿為郡樹為吐烟蓋樹老生火耳久亦結香

中通曰蕭伯玉年祖這植春浮

園遇雪則枯

荔枝 楓亭驛荔枝甲天下長樂縣次之廣以黑葉為美多食作熱鹽蜜解之蔡忠惠公譜荔枝徐煥廣之曰

荔枝蘆生者也焦核者去中根燒而種之故核小猶扇
畜則肉肥也有虎皮駝踉金梭江家綠一品紅而火山
最下林崇璧曰陳紫宋香為尤

賸曰興化狀元紅實小
而肉滿今楓亭無一株

矣

梨 有香青消梨瓶梨綿梨鵝梨金花寒雪紫水黃紅
諸名張子賢所云厭沙寺梨謂之御園其接以棠梨接
棗樹上按今用春分前接接用桑體或棠梨其實大以
油紙護之梨名快果百損一益梨核中子多種之少生

梨多生杜安南有菴羅果似北梨四五月間熟多食無害

棗 山東棗園至白露日根下遍堆草焚之以辟露氣也不爾則多乾落正月元旦日出時反斧斑駁椎曰嫁棗候大蠶入簇以杖擊其枝其年實多紅棗樹上熟而曬乾者也黑棗蒸熟而曬乾者也有摘青而曬乾者濟南府齊河縣有無核棗棗不接者壽有瓢棗酸棗雞心細核長棗圓棗大小棗龍棗棗卷曲結實不堪食南棗出蘭

溪搖而知之其肉離核木細中剖剝贊寧曰棗木為匙取其不餒不粘飯也

銀杏 核兩頭尖三稜者雄二稜者雌雌雄同種相望結實或雌木不結實則鑿孔納雄木一塊泥之亦結

柿 歸田錄云百十柿以一槓植置其中則紅而熟爛

榲桲亦可土人謂之烘柿今但取青者入甕中自然紅熟其曰海門銅盆方蒂匾花皆其名也海門經久雨則蒂脫綠柿耐久藏即閒居賦梁侯烏桲之柿也春分接

於本體白露時摘下碎擣每升水半升釀四五時柿液
造雨蓋及紙扇用之當結實時雨多從跗至尺以膚間
橫裁之不脫

蒲萄 蒲萄三五月斬其藤插於芋艿種之一日灌冷
茶間兩日復以水又以肥肉汁蒲萄穿棗木而生最甘
入麝於其皮則蒲萄盡作香味陝有白綠瑣瑣三種西
番以釀甚妙白大而綠無核子瑣瑣至細兒食痘稀

芋 二月種五月刈七月再刈九月又刈績者以首芋

柔末芋脆棘則惟繩索需稚芋可芼袁州種佳燒灰淋
汁足為磁洑

棉花 夏前濕子染以草灰播於鉏熟旱地為溝宜深

當芒種時三耘則茂秋前摘去散頭則花繁子多花三
出結鈴亦三瓣紡布以此其子仁可榨油為黏舟用北

方棉花 靱南方棉花鬆

中通曰棉花逢雨便嬌不堪則
土結皮故棉花嘗鋤數十次惟

種蕎麥不
必多鋤

罌粟花 廣義重九種子或曰中秋午種花後囊如瓶

有細米可粥可以取油其殼入藥主瀉斂其結青苞時以鍼刺十數眼其津液自出收入磁器用紙封口暴二七日即成鴉片最能瀉精

蘭 廬山幽蘭有一幹十二花者王逸以楚辭之蘭為都梁朱子從之方虛谷定為醒頭香瀕湖從之傳曰蘭有國香而以醒頭草專之乎今貴建蘭一幹九花以葉直起者為上其斜披者章蘭也二月割去以茅燒之令其再發則直起而青潤矣傷水葉生蟲亦宜燒去而忌

酷日苦雨盆下宜碎瓦襯之上乃土培馮夢禎快雪堂漫錄曰山土火煨羅過種澆清水以乾土得水脹而抱根也蘭根甘而生螳宜浸根於盆水取出以溺澆之復置水中俟螳浮水為度今或置伏龍肝或置人髮皆制蟲也茶油枯梓為妙一曰盆底用麩炭屑則利水而蚓不來陶石蕒曰蘭喜清而惡肥此誤說也愚者曰深澗幽蘭誰灌之哉庭蓄建蘭蓋有道焉蘭灌肥則易生蟲須別處燒草皮以肥沃之至春分時取此土以培蘭四

周作溝以猪毛水澆之則沿溝起箭喜陰惡日或燂雞
鴨毛水不宜多也根密則茂分之亦以春秋分其品以
玉魴為貴極蘭發箭開極者也九節箭其盛也報春先
一幹止一花臘底發箭蘭結子曰蘭筍長房八稜秋霜
裂而子飛去預護之熟亦可種也魚子蘭木本也長條
細莖如粟小者曰賽蘭香易入物然性有毒幽蘭建蘭
根甘宜入藥其花可茹葉以浸油黑髮都梁蘭根名土
續斷此亦宜名武功山有五色蘭葉似蘭而稍薄紫蘭

葉似仙茅

兆充曰幽蘭花有十瓣者充曾見之黃山有
瓊珞蘭木本而香色俱不減魚魷蘭莖弱

茉莉

即耶悉茗花瓣長者素馨也蘇門瓜哇有摩梨

柰花即茉莉成樹者嶺北江南霜後糊室收之最畏隙
風晴則取出受日以午澆之每大瓊可插猪鬃二百至
春煖後置露天晴則三日一澆水五月則日一澆燥
更倍之性喜曬澆亦宜午後六月則澆二三次立夏至
仲秋皆灌窵汁

糞水埋者

五日一灌灌汁後忌水俟次日下

水大花汁與水均小花七水三汁可也摘嫩枝使再發

則岐繁矣六月可插枝種根下生蟻澆烏豆泠湯保生
錄茉莉花勿置牀頭能引蜈蚣

種蓮 夏前淺池腴土築實卧藕覆泥疎種露萌而浸
之瓊種以糟查皮屑壅之女栽則矮周益公曰羊角入
池栽荷立成寧獻王曰酒甕頭泥種即開花建寧饒州
蓮子大而黧墨娥曰蓮子入雞卵伏如法取出以天門
冬為末和肥泥安盆中將蓮實磨穿一頭種之勿令水
乾自然生葉開花如錢極惡桐油又有睡蓮北戶錄曰

睡蓮如荇而大沈於水面花數莖五色當夏自開夜縮
入水底晝復出乃是萍蓬草類

別有蓮心 蓮心一名茶菱出建寧及寧州五月淺水
種子角柔肉甘香非蓮花之心也

水仙 六月根囊出土取縣簷下風吹又烟薰踰月浸
糞而復簷吹十月盆栽沙石水養不用泥土花高於葉

金盞銀臺

南京安德門華嚴寺前花匠畜水仙云但取
大如卵者夏出土縣之九月積石子栽數年

乃大大
則開花

菊 北種最繁怯水喜陰五月肥沃之則高摘蓋少畱
者花大若有癰頭菊蟻傍置鼈甲引出棄之有黑蚰瘡
其枝以麻裹筋頭捋出之蚯蚓傷其根以石灰水灌河
水解之象幹蟲賊其葉磨鐵線穴搜之劉蒙泉范至能
史正忠譜至百種有龍腦新羅玉金萬鈴合蟬銀臺諸
名物有以人為而愈變者入藥取甘菊苗亦可芼
至菊灰止小麥露田汝成
曰爛氏徒壯菊紫蛙不驗

木芙蓉 江北木芙蓉冬槁浙閩廣皆成樹七月開十

月止故名拒霜有紅黃白花有大紅者四面者粵西漆色芙蓉花朝開正白午後微紅夜深紅此則轉觀花也冬髡條置向南日下覆以乾壤候春見萌則為深坎插之取皮風戾之漚池為綆甚能勝水

中通曰取皮作線為汗衫不臭

鳳仙花 子名急性苗可芼葉不生蟲蠹子能爛物根花同礬能糟骨角變絳色最易種也又有金鳳花乃金雀花灌生細葉黃花者也俗混呼之

玉蕊瓊花 瓊花觀在揚州新城一名后土祠政和中

改蕃釐院唐李衛公咏唐昌玉蕊是也海陵南下徙種
北去未幾故株復生周益公曰蔓如茶蘼冬凋春茂柘
葉紫莖三月八出鬚如垂絲上綴金粟花心抽一莢出
衆鬚上散為十餘蕊王建云一樹玲瓏玉刺成楊巨源
云蕊珠宮上玉花香曾慥謂瑤花山谷謂山礬皆臆也
八仙花體似繡毬白花八朵為叢結子瓣薄而不香瓊
花不結子瓣厚而香元瑞辨之滇有鄧花亦八蕊有五
色銀毬八面五出而佛齊者八面四出然曰瓊曰玉未

嘗不可通名

長生草 金釵石斛一名長生草開小白花甚香若根
莖間纏以人髮鐵絲絡之縣風日中自生又挂蘭桂之
亦生石崖千年松菊卷柏可紙收筍得水蒨然皆長生

草

本經石長生丹沙草葉似蕨而細如龍鬚黑如光漆
冬不凋國經紅花草名長生又通泉草禿瘡花一名

長生葉似地丁中抽莖白花摘下經年不槁深山木石
上生雲霧草如琴絃亂絲無花葉有黑如髮者黃如金
者

杜鵑花 即躑躅類有大紅粉紅黃者千葉可珍喜陰

畏油烟映山紅有紅白深淺皆單葉紅者取汁可染

梔子 有單花重花四季花皆六出芒種時穴腐版泥
塗翦枝種之浮水面候根生而刈種之入藥取小者染
取大者然易脫色周吉甫所言白雲寺鄭强墓地之簷
蔔則外紫內淡黃者也景煥言青城申天師進紅梔子
種象躡花含笑花則似梔子者也

芝 芝有五色服食成仙者謚言耳木威喜芝類即松
脂入地所化其上生小木若蓮花夜有光持之滑燒之

不焦佩之辟兵蔡條云政和間芝動二三萬本斬黃間
一鋪二十五里遍野而出王元美言嘉靖中各省進五
色芝者無萬數也多藥成者上好祥瑞何難紫脫朱草
滿天下耶潛草曰搗糯米飯雄黃及鹿頭血或碎其角
加諸色藥包暴乾冬筍冬至日埋之或灌藥入老樹爛
椿明春雷雨即生五色芝高山生水晶蘭獨枝白瑩乃
白芝也

穿心排草 本草以排草為薰愚者見廣西香薦即零

陵香在平樂山中見為蒿本若嶺北有香草對節生葉
兩葉相連長五六寸而幹穿其中土人呼為排草亦呼
穿心草又有夏開細粉紫花如薔薇乾之香亦名排草
斷腸草 一枝三葉葉大於蓼食之輒死秋海棠亦名
斷腸草亦毒人宋顧文薦船窻夜話曰斷腸草近人則
葉動人誤食之則以伏卵不生者斫和香油灌之薺麻
亦斷腸枝葉近膚皆壞惟人溺可解古巴島有異草毒
木人持其枝葉即死東雲雜言薺麻如麻葉而長碎有

刺高三尺耀州延綏包手取以飼豕即肥

桃金娘 桂林野花叢開似梅而末微銳似桃而色更
頽中莖純紫絲綴深黃如金粟土人呼為桃金娘八九
月實熟青紺若牛乳狀味甘入脾養血其花能行血

龍鬚草 芒種勿墜龍鬚草墜則生蟲退色此與燈心
草皆莞也可以為蓆今肇慶金渡專以龍鬚草織蓆為
市

淡巴姑烟草 萬歷末有攜至漳泉者馬氏造之曰淡

肉果漸傳至九邊皆嚙長管而火點吞吐之有醉仆者
崇禎時嚴禁之不止其本似春不老而葉大於菜暴乾
以火酒炒之曰金絲烟北人呼為淡把姑或呼擔不歸
可以祛濕發散然久服則肺焦諸藥多不效其症忽吐

黃水而死

中履曰瀕湖載金絲草或曰即烟履按金絲草出慶陽治諸血惡瘡涼血不言作烟食其

性亦異

靛 監有數種槐靛葉似槐以五月種畏水浸之蓼靛
葉團大葉藍似苦蕒惟山靛染易上青葉似賽蘭三月

插條種之然大青難種小青可數刈諺曰靛無膽愚者
嘗訊之田父曰擔乾靛者遠路搖之則復稀如粥置之
復堅成簍時以地灰充之多是八成其浸靛者對日取
出而撞水必力士一氣三百餘杵則成緩歇一杵捫水
無聲則靛不佳染家用青黛染紙用靛花其瓊以火溫
之冷則發瘟

萍 天問靡萍九衢王逸注生九衢中謬也即田字草
破銅錢醫雞蒙眼最驗神農本草經水萍勝酒故周禮萍

氏謹酒謂萍不溺也此一夕九子之小萍

紅豆樹 滇南紅豆鮮紅堅實或嵌骰子或畱銀囊俗
以為吉祥嶺南樹似槐材有細花雲秋開花二三月英
枯子老千金方治猫鬼病吐之乘雅以紅豆與高良薑
紅豆蔻為一物則非矣半截紅半截黑為相思子段公
路云蔓生其別見一種乎嶺南北婆羅樹高大皮青葉
似大青對生而厚八月結角如刀豆裂開有紅豆永久
不壞非高座寺門之婆羅也

中道曰望春樹子
赤紅而久則黑

蒲刈蒲不逼跗花可食可禱精在弱黃醫用散血速
各種取油 皮油烏桕之皮煖油桕子連皮所熬之汁
也桕子核中有油曰子油墨烟宜桐油入藥宜生榨之
芝麻油食茺宜茶子油豆油點燈便菜子油若桕子油
更經點也玉山桕油蠟燭通宵甚堅嶺北桕油燭止可
冬點過春則不明莊綽曰芝蔴八扣雨暘時薄收大旱
時大熱開花向下結子向上炒焦壓榨才得生油膏車
則滑鑄鐵乃澁宗奭曰炒熟熱壓之生油但可點照再

煎煉之熟油始可食而不中點照一曰麻油出炒熟者
曰生油出生研者曰熟油虛舟曰芝麻炒熟入沸湯油
悉浮可取用紅花子油蔓青子油樟樹子油菜菰子油
番豆仁取油皆佳山東以蒼耳子作油治瘋卧子曰蓖
麻壓油以罌埋土中一年取出則白作印色油佳又法
先以熱水浸之其色黑再浸之數次則水白然後榨取
油可食最甘罌粟油固精甘蕉油蕪菁油黑髮紫蘇子
榨油燃燈甚明可油器物又能柔五金八石凡榨油先

炒子磨之又碾之乃蒸之草苴入鐵圍上榨蒸不可大

過大過則有水氣

中通曰積書點麻油無烟不損眼然易燥每斤以桐油三兩和之或入少

鹽亦可省油以生薑擦蓋邊不生滓暈中履曰菜子乾二石榨油八十斤飽芝蔴二石可百二十斤白麻不能也黃豆潤者二石取十八斤柞木壓之可二十斤 暄曰豆油巴油紙作字塵染不減

竹 初節歧枝者雌孕筍也記其南枝宜雨種之或去

枝或架扶使人糞不便豕通其生花者斫而灌糞可也

結實斑文兩兩相比謂之竹米

亦可下積

趙德麟曰六十年

筍復斫而以子種六年而復瘞以死猶能引過牆防過

則溝之卧芝蔴稈以竹忌也周子克曰以襍細糖和土種竹茂或以麥拌土宜推之忌足踏冬宜掘旁行筍則直根遠行挑出筍時腐草覆之又灌以糞則茂畏水又畏大旱山種苗竹向下坡種罌竹向上糞壤筍美瘠地質堅篁苦淡三種入藥戴凱之譜六十一後人侈載頗

有名異實同者

員丘箬竹崑崙箬竹神異節箬扶南雲母竹節可為船羅浮龍公竹臨賀竹有

十抱者漢竹節受一斛交趾梧竹為甌皆大蕩空蘭類也黃濟植芳竹東坡咏澁勒即芭籬竹有刺者服陽竹掌摩竹海南木竹菰葉竹皆實心者絲箬叢生蜉蝣根截案面則慈孝類也定海靈峯澧州成都安成奉新澄

州皆產方竹八月出筍節圓小刺又有三稜竹人面竹
廬山有匭竹交趾策竹刺虎南方慈筍為矛即筋竹筴
筴之類閩有古散竹皮似梭杜臺卿淮賦有積榔竹即
棕竹類羅陽竹似芭蕉蕉梭本一類也吳都賦實簣
筴即越女試劍竹葉廣遼箸類也建安實簣一名簣竹
中似人形北戶錄漆州通竹無節馬觀曰占城觀音竹
如藤長丈八尺色如鐵每寸二三節利竹亦蔓生若藤
弓竹不能自立雲南有垂絲竹襄州卧龍山武侯祠筴
竹百尺稍上生葉狹竹即叩腫節遼葉紫竹斑竹先青
後變齊民要術筴竹黑皮竹汗有文澄州有黑竹道州
漣中多丹竹宜都飛魚口有紅竹黔陽有赤岡竹雷州
電斑竹瑞筠山竹色如爛銀箬竹頭有文廣西雪竹大
斑紅暈梅露細斑也莖隋竹蟲蝕箬如魴咸都黃竹溝
青安思苦竹四色當塗縣慈姥山簫管竹皮白如霜蓋
竹亦白皆以色名廣州相迷竹鋪竹皆生黃甘竹殼薄
即江南竹簡簣竹無錫篴如苦竹永嘉大羅山龍牙竹

稀節箇籜籜等射箇皆箭篠也九疑有雙稍竹浙有天
親竹未皆兩歧臨海狗竹毛在竹間雪峯有食竹漢陽
有籜萃竹薛翊記蘇麻竹桃枝可為席簾竹可為笛箏
竹筍煮為布顧微所云包竹也會稽公孫竹高不盈尺
奉化新嶺五寸白竹辰州龍絲竹盈尺如鐵鳳栖崖小
墨竹皆滿湘鳳尾類也越王竹乃沙簪石竹碧蟬凝波
竹花如榴皆葉似耳陽谷漫錄安
福有十二時字竹殆藥書之乎

種地黃 懷慶東灣最佳畦坑糞土正月種之以冬爛
草覆之候芽稍出以火燒草去其苗再生葉肥根益壯
有一斤三十枝者餘或揉或以菊花心為貴本草言二
八月采不如冬月采妙浙中亦種之歐陽獻萬以西山

麓田種之獲數倍於稻乘雅曰種芡次年種牛膝次種
芝蔴十年乃種芡芡收地汁也

種芍 春沃土種之過三年則大取單葉花者赤白舊
以花分或以火酒浸根一宿而辨之今按山中種芍者
采根曝乾即赤芍刮其根皮而蒸乾為白芍

種朮 汜勝之曰榆莢雨時高地疆土可種朮馬蹄為
佳切而種之猶芋薯也忌肥妨蟲最宜金汁馮應京曰
仲冬栽朮忌青色物相裏及澆灌又忌用婦糞則虛心

而黑

牛膝 秋收子春種肥地深耕土鬆易長翦苗食如翦
韭法旱則鋤耘荒則澆水秋亦可種其節腫故名牛膝
其根直下一尺餘有力如牛也

淮膝細川膝
及各地根粗

石菖蒲 生水石不沾土辛入心者也一寸九節屑瓦
栽之以夏布幕其上則細而短收烟明目黎美周言得
羅浮石菖一寸十二節王石攻言武功山有十五六節
靈壽木 綱目言似竹長八九尺圍三四寸有刺可為

杖及馬鞭漢賜孔光者藏器云桴丈餘莖有刺山人取頭茹食謂之吻頭智見乃蕉棕本也凌冬不凋葉如山薑葉邊有細刺枝有大刺發枝有梭直幹節拔生秋結子成珠如竹實之紋味酸可食謂之薑酢子其幹則京師四品以上開棍用之號甘蔗棍陸元恪曰据即櫝也即今靈壽

種枸杞 西寧子少而味甘它處子多惠安堡枸杞徧野秋熟最盛今各處可種以三月朔截作段先以草糞

而牛糞蓋之又土蓋之出則勤澆一年可五翦枸櫞言
易生也

接木法 陳瑩中曰色紅可使紫葉單可使重花小可
使大少可使繁則人力之用天也或將發生時或將黃
落時春分前秋分後是其候也執刀端直不至重傷則
易成大生至一二年者可接其接枝亦翦其已生果二
年有旺氣者過脈乃善凡腰接木之盈地者近跗一尺
細齒鋸之為枯又以利刀裁枯使光則不沁水遂從枯

之一旁裁開其皮微連其膜約一小寸先使翦下之枝
裁去兩旁而置口含之使熱連唾插掩紙封箬封麻縛
而以乾壤少潤復不宜灌又遮日暴俟成體乃可開也
七頭接者木枝與根各斜截其半以人唾粘掩之以瓦
規土灌使少潤晴陰皆以器覆之要須同氣味相合如
芍藥與牡丹方可七頭接也其寄枝者先裁其旁春分
交而紐接之俟活乃各裁其本木之枝其壓枝者春秋
壓其枝於地封之俟苞生根則斷半而移焉脫木者和

牛羊之滓包其鶴膝處先微傷其膚而縛之復以杖支之隔年根生則斷而移焉善木者臘月側坎而揆釘斷其中根止畱四散生者覆而灌之則生子碩大也修木者亦以秋冬裁痕向上則雨不食心盡其枯朽則不引蛀其欲木直者視其不足處以刀剗其膚氣行則傷痕先滿而身直矣北人云以胡桃條接於桺木易活而連實郎仁寶曰冬青樹上接梅則開洒墨梅桑上接楊梅則不酸若生癩以甘草鍼之則无約法曰樹以皮行汁

斜斷相交則生用泥泥之或以銳皮連木者插所砍之
木心而泥封之倒插而生者析其皮而緒之也至於性
情所宜畏冷如橘畏熱如梨松宜乾檜宜濕茉莉喜日
薑苗畏日桑柳宜髡且用其肄間年歇枝多種分半而
摘其實可也南北高下先後早晚各有其宜北蔓菁有
根南菁菜惟葉橘逾淮則為枳矣榛松子盛於遼陽龍
荔在閩粵荔子甘草在南有成樹者南詔梅李食於初
春梧桐子長大而摘既末臘之松子大於荔枝若夫鬱

養強熟京師百菜初春獻焉不可不知

插花法 折木花用火燔其折處花不易謝海棠花束薄荷於折處梔子花折處槌碎之以鹽入器中不用水牡丹用蜜不用水梅花用煮肉汁去油俟冷養之插梅每旦當刺以湯插芙蓉當以沸湯開以葉少頃插蓮當先花而後水插牡丹芍藥蜀葵萱草皆當燒枝虛舟子曰花瓶中水燒瓦片投之不臭冬月濃灰汁入酒不凍鮮肉凍汁插花耐久

枯樹活樹 木插肉桂而枯以甘草灌之復榮烏賊骨
釘之則翳狗膽解之復榮或曰鮭魚乾樹即墨魚海螵
蛸也或曰河豚骨或曰邵陽魚刺日西時樹陰即死一
云桂斫木上則茂斫木下則枯大榕樹以蘇木作釘釘
其根則死柚樹以一銖阿魏入其內則立乾蒲萄以甘
草鍼鍼之即死以肉桂屑布地草不生穴果樹以鐘乳
粉納之則實多味美納於老樹根皮則瘁者復茂人溺
蓴麻即姜豆汁澆鼠莽根即爛薤汁滴野葛即死

暄曰
或云

凡樹離根三尺斧其皮納
已豆數粒則汁瀉而死

造木轉塚法 先一年斷木之四週曰轉塚若木大者
先三年每年輪開一方乃可造種果木宜疎當以丈二
為距八月至正月皆可種之白下時人畜此待好事者
之價雖酷暑中可頃刻成花園也

伐木畱花皮者不裂 凡木筏至蕪揚者斬木必花其
皮不去皮則不定其性全去則易裂清流木皆如是若
在江西以上流近斬近用則全去其皮江楚瓠子槿子

鬆久則從內壞出清流木堅久則從外爛入其浸水透者二分而止久亦不裂

灌法 發萌時勿灌灌則蕃翳灌亦宜晚涼之候其糞及燂猪湯退雞鵝翎湯皆不宜親木跗必生蛀凡雞鵝翎湯投以荔枝龍眼之核則翎腐當果實時灌之摘食後灌之臘前通灌之糞必久宿雜以水澆花用塘中之積水佳於新水以其水煖而壯故也凡花蔬宜日未出時澆惟茉莉與莧菜甕菜喜日中澆

中通曰馬通和水可催花早開幾日

養花通理 養花木事當家人以消遣心為之故善不
更事者欲以急就心為之安得其理孔子曰吾不如老
圃修花盤幹者穴幹納巴豆則枝節柔軟可結花被麝
冲急用艾雄黃於上風燒之立解

盆內欲竹木小者以
溺浸大炭多年穿穴

種之則活
而不長

草木好惡 牡丹得鐘乳粉而茂海棠得糖水而花鮮
牡丹花根下置术諸種顏色皆是腰金凡栽花根下置
白籛末辟蟲穴中點硫黃殺蠹海棠花莖用薄荷水浸

則開養石菖蒲無力而黃者根下宜鼠糞惟枇杷不宜
糞凡花紅者令白以硫黃燒烟熏蓋花則白建蘭葉
喜人拊之水仙惡人拊之種果木宜望日前而月晦日
晚可種莧果熟人盜其一則鳥來啄之

治花木蟲 去果木之蠹蝨蛄蝨者以杉木為鍼闕塞
其氣則自亡或以硫黃末塞之或以焰硝硫作紙線絛
穴中焚之走其臭皆亡或扮百部納穴中亦能殺蟲或
治魚腥水灑蔬果等癩蟲自消海魚尤勝池魚蟲能飛

動者取江橘齏以膠焉或種蟻以食柑蟲或順風燒油
簍以驅松蟲或用桐油脚入糞澆菜果樹掛竹燈架去
青蟲桃樹蛀者煮猪首湯冷澆之樹有蠹孔孔邊彈竹
蔑如蒲蟲聲蠹自出可悟啄木取蟲亦此理也林檎生
毛蟲埋蠶蛾於下或以洗魚水澆之西風雨能殺毛蟲
槐樹生蟲擂鼓於下則盡落芝麻柴掛樹上無蓑衣蟲

中履曰坑中置甘草
蒜則種樹不生蟲

製花耐久法 林洪曰十月後用竹刀取梅蕊將開者

蘸以蠟投尊缶中夏月以熱湯就盞泡之花即綻香可
愛張邦基木犀記曰搗女貞子汁拌巖桂半開者入磁
瓶中幕之至無花時密室置盤其香裊裊藏可留久顧
元夢云花摘半含半放者三停茶葉一停花確甕收之
一層茶一層花間投至滿紙箬紮固入鍋重湯煮之取
出待冷用紙封固裏置火上焙乾收用

中德曰幕盛樹
下擊木犀等花

收下石椎今匾築實於新瓶內用乾荷葉數層鋪之復
以枯竹片壓之乃汲井水浸之冬月五日一易水春秋
三日夏一日任意取用
收之如前經年不壞

留果法 韓彥直橘譜云金橘景祐中始至汴溫成嗜
之藏金橘於菜豆中梨同蘿蔔收皆久凡梨蒂香櫞蒂
插菜腹上可留佛手蒜薹其蒂蒂壞以蠟彌之風栗同
龍眼縣芡實同防風貯山查同麩炭貯橙橘同木瓜貯
皆不壞異物志曰香櫞浸汁浣芋勝似酸漿

草木通理 草木感東方春氣而發梅獨先者酸為木
性得氣之正晁迥客語曰釋謂火行為變化性如甘草
遇火則熱油麻入火成油則冷甘蔗蒸糖則熱揉水成

湯則冷蘭花午時發香荷花向午則斂蔭以猿啼盛發
芭蕉聞雷而長橘以尸榮而彫於北徙橘因骸茂而鬱
於東迢繁露曰蕪美生於燕枳榛死於荆其地氣然也
春分鐵烙梨枝而栽三月朔種枸杞四月硫招茄根五
月斫桑枝不則來春不生因乎時也構汁可以團丹砂
狗骨皮汁可以粘雀雞腸菜汁可以粘蟬茯苓碎瓦辟
荔壓樹杞版受刀復合柿木畫皮生文世傳紫薇花畏
搔癢蓋其枝易動也納鹽落欖惡鹽也欖汁泥船隙如

漆入水盆乾蓋攪之膠也皂角樹以篾箍之以木砧箍
盡落皂角不實者鑿孔入鐵泥三斤封之鐵鍋煮皂莢
則爆落火釘番蕉則茂梧桐砍皮則大藤芋畏指指即
落莧汁拌鼈肉隔夜即成小鼈不驗蓋為其成鼈瘕也
蜜之忌葱生菜菔與地黃相反熟則無害凡人壯者少
食無傷如孟德啖野葛是也東坡曰桃花雙仁殺人
其花本五出六出必雙舊說草木花皆五出惟梔子與
雪花六出愚按水仙秦椒花仙茅花亦六出桃杏六出

雙仁殺人者失常故也木實之蠹者必不沙爛沙爛者必不蠹而能浮不浮者亦殺人木望前迨植多實社日杵根實大社酒澆根實繁元日火照名嫁果樹上元著磚樹岐李繁斧槌樹實不落

應月而生之通理 朱草日生一葉半月即落謂蓂莢此猶芋奶荈實應月生子也虛舟子曰梧桐遇閏益葉藕遇閏益節黃楊遇閏短謂之厄閏

藤刺之用 蔓草皆左旋蓋體天左旋也陰而承陽也

藤能入筋象筋也有刺者辛而走竅夜合楊梅刺其葉夜合辛而屬陰其性破血

木理實有文者 鷓鴣木半紫褐有蟹爪文半純黑如

烏闌烏櫚木即闌也有虎斑木有夜明木有雞翅木花

櫚結癭猶楠鬬斑也枏櫚謂癭瘤也

張絃有枏櫚枕賦

櫚木後

訛為花梨紋木有側戾文紫榆花楸亦似紫檀海欒時

亦結癭枕榔如棕竹而大與椰擺等皆可車鋸作器遠

東鞞皮木亦有斑鐵力木重海船作碇金剛木結實可

為念珠其小者貴無患木子黑曰鐵櫪牛首人先取鉗

之曰銅櫪所云番菩提則車鍍挑櫪子也金剛椒乃藤

子

樂華木子武當鬼見
愁子皆為念珠可觀

金荆榴 金色木也文緻盤感隋煬時朱寬征南得此

木數十片作枕及案

相思木 即紅豆樹大者鋸版有花文其近皮數寸無

文也南京以作扇邊骨多年數圍者可為書案亦稱雞

翅木猶香櫪之呼鸛鸛木也以紋似耳匠斜鋸之其花

較顯或以黃紫分稱

物理小識卷九